

Xujun xi tjun kits'ínkjihí nda postru Pablo xuta ninku Corinto

B'í ts'ín kikjaniñaha Pablo xuta ninku xi tjin nanki Corinto

¹ An Pablo, Ntjaná kits'ín mana nku nda postruhu Jesucristo at'aha b'a ts'ín kama mjehe. An ko nda nts'eé Sostene

² tísuniñaihi jun xuta ninkuhu Ntjaná xi tintsuboo nanki Corinto. Cristo Jesu kits'ín nga Ntjaná kikj'áts'enuu. Kinchjanuu nga kjuáts'enuu xi nkú ta kits'ínko ngatentee xuta xi tu má xi tjeheñ ni s'ejihin Nda Ntjaná Jesucristo. Kui xi Nda Ntjaná ko ta Nda Ntjaha xuta xu'bo.

³ Kas'enuu kjuanda ko kjuajyu xi tsjáná Ntja Na'miná ko Nda Ntjaná Jesucristo.

B'í ts'ín tsjaha Pablo máb'achjhi Ntjaná nk'ie nga f'áítsjehen xi nkú ts'ín nda kits'ínkoho Ntjaná xuta ninku Corinto

⁴ Tehente tsjaha máb'achjí Ntjaná nga f'áítsjenna jun, at'aha kisakúnuu kjuandaha Ntjaná. Cristo Jesu kits'ín nga kisakúnuu kui niu.

⁵ Kits'ín nga kin'ekjóhoon ngayje tíkjá kjuanchiná xi tsjá Ntjaná. Kui kjuanchinóo xi nkú ts'ín tjihin nga chubo ko xi nkú ts'ín tjihin nga kamankjinnuu ni xi ts'e Ntjaná.

⁶ B'a ts'ín kis'ejña chjhi ajinnuu nga kjuaxi én nda tsuhu Cristo xi kis'enijmínuu.

7 Kui nga najmi ndyjat'ahanuu ndaha nku kjuanda xi tsjá Ntíaná nk'ie nga tíchuyóhoo nístjin nga kuakúchji yjoho Nda Ntíaná Jesucristo.

8 Kō ndjá ts'íinkinchánuu Ntíaná santaha nístjin xi fekuu, tū xi najmi tjin ni xi n'enijéhenuu nístjin nk'ie nga kj'uaí ngáha Nda Ntíaná Jesucristo.

9 Ts'intjusun Ntíaná ni xi tsu. Kui xi kinchjanuu nga nkuhú kamakoo Ntíhi, kui xi Nda Ntíaná Jesucristo.

B'í ts'ín tsakúya Pablo nk'ie nga najmi nda tjin tsa najmi nkuhú k'ua xinkjín xuta ninku

10 Jun já nts'e, ngajoho Nda Ntíaná Jesucristo b'a tíxinnuu nga nkuhú ni xi chubo kō nkuhú ch'oo xinkju. Nkuhú kas'eyanuu kō nkuhú ni xi n'oo.

11 B'a tíxian, já nts'e, at'ahā xinkjín Kloe kitsúyana nga kjuachán rú tjin ajinnuu.

12 Tjin rú ajinnuu xi: “An tjennkia Pablo”, tjincha tsu rú. Kō rú tjin ngá xi: “An tjennkia Apolo”, tjincha tsu rú. Kō tā tjin rú ngá xi: “An tjennkia Pedro”, tjincha tsu rú. Kō tā tjin rú ngá kj'ai xi: “An tjennkia Cristo”, tjincha tsu rú.

13 Nga chasehe raá, ¿a tsakjányahá yjoho Cristo? ¿A Pablohó kis'et'a kruu ngandanuu? ¿A Pablohó k'íj'áts'enuu nk'ie nga k'ísaténtó?

14 Tsjahā máb'achjíhi Ntíaná nga najmi tjin ajinnuu xi an tsatentá, nku tutuhú Krispo kō Gayo.

15 B'a ts'ín najmi ch'a xi b'a kuitsuhu tsa an k'íj'ats'an.

16 Tā tsatentá xinkjín nda Estefana. Najmi tā f'áítsjehenna tsa tjin sa kj'ai xi tsatentá.

17 At'ahā najmi kui xá xi kitsjana Cristo, tsa xuta kuatentá. Nk'ie ní k'uenijmía én nda tsuhu, kui ní

xáha xi kitsjána. Kō najmi én nankā ts'inchjén nga nchja, tū xi najmi nku én tiya kamaha ngabayaha Cristo t'a kruu.

B'i ts'ín tsakúya Pablo nk'ie nga ajihin ni xi kits'ín Cristo kis'ejña chji nga'yúhūn kō kjuankjintak'uhūn Ntíaná

¹⁸ Én xi s'enijmí ngat'a ts'e xi nkú ts'ín k'ien Cristo t'a kruu, kui xi tū a éhén mahā xutā xi tindyja. Tunga máha ñá xi kin'ek'ankiná, nga'yúhūn Ntíaná maná kui éen.

¹⁹ At'aha b'i títsu Ntíaná má nga tjít'a xujun: Ts'inndyja kjuankjintak'uhūn já xi nankā ts'ínnkjink'un.

Ts'inndyjajian xi nkú ts'ín ts'ínnkjink'un já nkjink'uun.

²⁰ ¿Yá ndā xi nankā ts'ínnkjink'un? ¿Yá ndā xi tū xí mahā rā xujun? ¿Yá ndā xi mahā nchjanijmíyaha ni xi tjín asunntej? Tū a nihí kits'ín ma Ntíaná kjuankjintak'un nankā xi tjín asunntej.

²¹ At'aha ajin kjuankjintak'un nankāha Ntíaná y'énda nga najmi kjuankjintak'un xi tjihin xutā skuekohō rā. Kama mje nihí nga xutā xi s'ejihin én xi tís'enijmí, nga kui xi ts'íink'anki, én xi tū a éhén mahā xutā.

²² Xutā xi ntje judio tjeheñ rā mjehe skue kjuankjúhūn Ntíaná, kō xi najmi ntje judio tjeheñ rā mjehe kuasínñjuhū nku kjuankjink'un nankā.

²³ Tunga jin, nga kis'et'a kruu Cristo táb'enijmí. Kui ni xi najmi sasihin xutā xi ntje judio tjeheñ rā kō tū a éhén mahā xutā xi najmi ntje judio tjeheñ rā.

24 Tunga máha xuta xi Ntiana kinchjaha nga kjuáts'e, ndaha tsa xi ntje judio tjeheh ra ko ta ndaha tsa xi najmi ntje judio tjeheh ra, kui xi ts'ínkjáihin nga ajihin Cristo tsakúchji Ntiana nga'yúhun ko kjuankjintak'uhun.

25 At'aha ni xi y'enda Ntiana xi tu a nihí maha xuta, 'yún tjín saha sin nk'ie nga ni xi ts'innkink'un xuta. Ko má b'a maha xuta nga ts'innkink'un nga najmi tjíhin nga'yún Ntiana, yo ní 'yún bakúchji nga'yúhun nga nga'yún xi tjíhin xuta.

26 Jun já nts'e, n'ekj'áitsjon xi nkú ts'ín kinchjanuu Ntiana nga kjuáts'enuu. Najmi nkjin mahanu xi yaha nga nkjink'un. Najmi nkjin mahanu xi já k'aku. Najmi nkjin mahanu xi nk'a tjoon.

27 Tunga xi tu a xutahá maha xuta, kui xi j'ájin Ntiana tu xi tsjáha ra kjuasuba já nkjink'uun. Ko j'ájin xuta xi najmi chumi ni chjihí ra nginkun xuta tu xi tsjáha ra kjuasuba já xi nk'a tjen.

28 Ta j'ájin xuta xi najmi b'achíhi ra xuta ko xi najmi nda tí'mihi. Ta j'ájin santaha ni xi najmi kjee tjín tu xi kjéxihin ni xi ja tjín.

29 B'a kits'ín Ntiana tu xi najmi ch'a nk'a kama k'uasjehe yjoho nginkun.

30 Tunga nkuhú kits'ín makonuu Ntiana Cristo Jesu ko kits'ín nga Cristo tsichu ma kjuankjintak'unná. Ngat'aha ni xi kits'ín Cristo naxu tsichu maá nginkun Ntiana, kikj'áts'ená ko y'échjintjai jéná.

31 Kui b'a maha, xi nkú ts'ín jtít'a éheh Ntiana: “Xi nk'a k'uasje yjoho, ngat'aha ní ni xi kits'ínkoho Ntiana, kui ní ngat'aha nga nk'a kat'asjehe yjoho.”

2

B'i ts'ín kits'ínkjáútsjehen Pablo xuta nínku Corinto xi nkú ts'ín y'énijmíhí én nda tsuhu Cristo

¹ Já nts'e, nk'ie nga tsichuk'ienijmínúu én xi Ntíaná tíb'éjña chji nd'ai, najmi én tsjo tsu kits'inchjén kō tsa én xi nanka.

² Najmi kama mjena tsa kj'ai nihi kinchja ajinnúu. Nku tutuhú Jesucristo kinchjanijmíya kō á kruu k'ient'áha.

³ Nk'ie nga tsátejñajinnúu najmi nda chánka kama yjona. Títsankjun níná kō xí tíb'atsénkjúnná.

⁴ Kō nk'ie nga y'enijmínúu kō tsakuyánúu éhen Ntíaná, najmi kits'inchjén én nkjink'un xi s'ejihín xuta. Espirituhu ní Ntíaná kō nga'yúhún Ntíaná y'ejñá chjikohona ni xi kinchja,

⁵ tu xi s'ejihinnúu Ntíaná xi tjhín nga'yún, najmi kjuankjink'uhún xuta.

B'i ts'ín tsakúya Pablo nk'ie nga Espirituhu Ntíaná xi y'éjña chjiná kjuankjink'uhún Ntíaná

⁶ Tunga ajihín ní xuta xi ja tsichu mankjihín ni xi ts'e Ntíaná kjuankjink'un n'echjéin nk'ie nga chubakoi. Najmi kjuankjink'un xi ts'inchjén xuta n'echjéin nga chubai, kō ta ndaha najmi kjuankjink'un xi ts'inchjén já xi batéxuma n'echjéin, já xi ndyja ndyjún nkiní.

⁷ Nk'ie ní bakuyái éhen Ntíaná, chubanijmíyai ni xi kits'innkjink'un Ntíaná nga y'éjña 'ma. Kui niu xi y'énda Ntíaná kintehe ni nga kits'ínnda asunntee. B'a kits'ín tu xi s'ehená kjuachánka.

⁸ Ndaha nku xi batéxuma asunntej najmi kamankjihin kjuankjintak'un xu'bi. At'aha tsa kamankjihin niu, najmi kingját'a kruu ra Nda Ntíaná xi tjíhín kjuachánka.

⁹ Tunga b'ahá kama xi nkú ts'ín tjít'a éhen Ntíaná:

Ni xi najmi kieke xuta kō najmi kint'é,
xi ndahachí najmi kjee n'enkjink'un,
kui nihi xi Ntíaná y'énda tíjjun,
ngandaha xuta xi incha tjoho Ntíaná.

¹⁰ Espirituhu Ntíaná y'éña chjiná ni xi y'énda tíjjun Ntíaná. At'aha Espirituhu Ntíaná be sisin ngayjee ni xi tjín kō santaha ni xi 'yún nankaha Ntíaná.

¹¹ At'aha, zyá xi be xi nkú ts'ín ts'ínkjink'un xuta xi kj'ái? Nku tutuhú xuta xu'bo xi be xi nkú ts'ín ts'ínkjink'un. B'a ta ts'ín najmi ch'a be xi nkú ts'ín ts'ínkjink'un Ntíaná. Nku tutuhú Espirituhu Ntíaná be xi nkú ts'ín ts'ínkjink'un.

¹² Ngat'a ts'añá bi, nginkun Ntíaná nibáha Espiritu xi kin'ekjáihín, najmi asuntej ts'e. Ntíaná kitsjáná Espirituhu tu xi kamankjihinná kjuanda xi kitsjáná.

¹³ Kui niu xi chubai nk'ie nga bakuyái. Najmi n'echjéin én xi bitjuhu kjuankjink'uhun xuta. Kjuankjink'un xi bitju níhi Espirituhu Ntíaná n'echjéin. B'a ts'ín 'miyaha ri xuta xi tíñajihín Espirituhu Ntíaná ni xi ts'e Espiritu.

¹⁴ Xuta xi najmi tjíhín Espirituhu Ntíaná najmi ts'ínkjáihín ni xi ts'e Espiritu, at'aha tu a nihí maha. Najmi tjín nkú ts'ín kama kamankjihín ra, at'aha nku tutuhú Espirituhu Ntíaná b'éña chji niu.

15 Xi tǐñajihin Espirituhu Ntíaná, kui xi mankjihin ni xi tǐn. Tunga xuta xi k'oo najmi mankjihin á kj'ai ts'in ts'innkjink'uhun xuta xi tǐñajihin Espirituhu Ntíaná.

16 At'aha b'i ts'in tǐt'a éhen Ntíaná:

¿Yá xi be xi nkú ts'in ts'innkjink'un Ntíaná?

¿Yá xi tsǎniyáha?

Tunga ñá bi, n'enkjink'aán xi nkúhu Cristo at'aha Espirituhu Ntíaná tǐñajinná.

3

B'i ts'in kitsúya Pablo xá xi kikanéhe ko xá xi kikanéhe Apolo ajihin xuta ninku Corinto

1 Jun já nts'e, najmi kama kinchjakoñuu xi nkú ts'in nchjaka xuta xi tǐñajihin Espirituhu Ntíaná. Kinchjako nínuu xi nkú ts'in nchjaka xuta xi asuntee tǐhen ra, xi nkúhu xuta xi as'ai kuakatuts'ihín ra nga kuakakj'á éhen Cristo.

2 Kintehe ni nga ni xi ndjá kuakuyáñuu, tu ni xi najmi ndjáhá tsakuyáñuu. At'aha b'a k'un ntí xihí k'un, ntí xi tu ntáchikihí 'bi, xi najmi ma kjine ni xi ndjá. Ko santaha nd'ai najmi kǐe tǐndanuu yjonuu tsa kamankjinnuu ni xi nanka tǐn.

3 Asuntee y'a sanuu. Nk'ie nga tǐn sa ajinnuu kjuanchini ko kjuachán, ¿a najmi asunteehe y'ahanuu? ¿A najmi b'ahá ts'in tintsuboo xi nkú ts'in tǐntu xuta asuntee?

4 At'aha tǐn xi: “An tjennkia Pablo”, tǐtsu ko tǐn ngá xi: “An tjennkia Apolo”, tǐtsu. Nk'ie nga b'a tǐn'o, ¿a najmi b'ahá tǐn'o xi nkú ts'in xuta xi najmi be Ntíaná, xi najmi tǐñajihin Espirituhu Ntíaná?

⁵ ¿Yáha Pablo? ¿Yáha Apolo? Tu já musuhú niu xi Ntjaná kits'ínchjéhen tu xi s'ejihinnuu. Nga nkúnkúí kin'eí xá xi kitsjáni Ntjaná.

⁶ Xi nkúhu tsa an y'entje yá tuu ko Apolo kikuhun, tunga Ntjanáhá xi kits'ín nga kisá yoo.

⁷ Kui b'a maha, najmi xi b'entje yoo ko ta ndaha xi kuhun, tsa kui xi chánka. Nku tutuhú Ntjaná xi kits'ín nga kisá yoo, kui xi chánka.

⁸ Xi b'entje ko xi kuhun yoo tu nku chubahá. S'echjíhi nga nkúnkú xi nkú ts'ín kits'ínxá.

⁹ Nga nkúnkúí makoí xinkí nga tín'exát'aihi Ntjaná. Jun xi nkú joyaha jñá xi ts'e Ntjaná xi jin tín'exájin.

Jun xi nkú joyaha ni'yaha Ntjaná.

¹⁰ Xi nkú ts'ín tíjña kjuandaha Ntjaná xi kitsjána, an xi kama nda maestru chjínexjó xi kingjájña tuts'in ni'yoo. Ko kj'ai ngá xi tíncha kjesintjen xjóho ni'yoo nd'ai, tunga ndahá ts'ín kats'innkjink'un nga nkúnkú xi nkú ts'ín ngjuaindjuko xjó.

¹¹ At'aha Jesucristo, kui xi tuts'in xjóho ni'yoo. Najmi ma s'ejña sa kj'ai tuts'in xjó nga xi ja kjijño.

¹² Asun tuts'in ni'yoo kama chjúsintjen xjó xi kamandakoho toonsine, ko a ra toontaba, ko a ra ndjio tsjo k'un, ko a ra yáte, ko a ra ndji, ko a ra xka.

¹³ S'ejña chji xá xi kits'ín nga nkúnkú xuta nistjin nga kuasehe Ntjaná ni xi kits'ín xuta. At'aha nd'í xi kj'uaí kui nistjiun k'ujéña chji xi nkú k'un xá xi kits'ín nga nkúnkú xuta.

¹⁴ Xi kits'ínnda xjó xi kujichúkuaha nd'íu, kui xi ts'ínkjáihjin chjíhi.

¹⁵ Tunga xi kits'ínnda xjó xi k'uetihi nd'íu, kui xi

ndyja ni xi kits'ín, ndaha tsa tu kui kuankihí xi nkú maha xi nd'í bitujin.

¹⁶ ¿A najmi yanú nga jun xi ninkuhu Ntíaná ko nga Espirituhu Ntíaná tijnajinnuu?

¹⁷ Tsa tjin xi ts'ínkatsún ninkuhu Ntíaná, Ntíaná ts'ínkje xi b'a ts'íin. At'aha tsje ninkuhu Ntíaná, ko jun bi, jun xi ninkuhu Ntíaná.

¹⁸ Najmi tu ch'a k'uanachaha yjoho. Tsa tjin ajinnuu xi b'a maha nga kui xi nkjink'un xi nkúhu já nkjink'un xi tjin asuntee, tu sa ní nku nda xi najmi chumi nihi xi maha kats'ín ma yjoho, tu xi b'a ts'ín kuichú ma kjuaxihi nku xi nkjink'un.

¹⁹ At'aha kjuankjink'un xi tjin asuntee, kui xi tu a nihi nginkun Ntíaná. At'aha b'i ts'ín tjit'a éhen Ntíaná: “Ntíaná ts'ín nga ta kuihi kjuamañaha já nkjink'uun jnejin.”

²⁰ Ko b'i ta ts'ín tjit'a ya: “Ntíaná be nga tu a nihi ni xi ts'innkjink'un já nkjink'uun.”

²¹ Kui b'a maha, najmi tu ch'a nk'a k'uasjehe yjoho ngat'aha yá xi tjenni. Jun kich'o ngayjee ni xi tjin.

²² Pablo, Apolo ko Pedro, asuntee, kjuatik'uun ko ngabayoo, ni xi tíma ko ni xi kama, ngayjee niu jun kich'o.

²³ Cristo y'anuu, ko Ntíaná y'aha Cristo.

4

B'i ts'ín kitsúya Pablo nkú tjin ra xaha já postru

¹ Kui b'a maha, já xi ts'inxát'aha ra Cristo katumannu jin nga chaseni, já xi kik'ai xaha nga kuakúya ni xi y'éña 'ma Ntíaná nistjin nk'ie ko mjehe nga k'uéña chji nd'ai.

² Yahá nga xi 'b_{ai}h_i nku xá binchi_hi nga kix_i ngju_{ai}ko xáha.

³ An bi najmi kjintahana tsa chaso_ho mí nihi xi nda ko tsa najmi nda títs'ian ko tsa nku nda jue xi b'a ts'ín. Ta ndaha an najmi be xi nkú ts'ín ts'innisi_hi rá yjoná tsa mí nihi.

⁴ Nda tjíya kju_{an}kjintak'unná tunga najmi kuih_i niu tsuhu rá tsa najmi tjenna. At'ahá Ntí_{an}áhá xi basehe ni xi ts'ian.

⁵ Kui nga najmi tu chasehe ruu yá xi nda títs'ín ko yá xi najmi nda títs'ín kintehe ni nga kj'uaí Nda Ntí_{an}á. At'ahá kuih_i xi ku_{ak}úchji ni xi tíjña 'ma má jyuun ko k'uejña chji xi nkú ts'ín tjíntuyá animaha xuta. Kui nístjiun Ntí_{an}á nda ts'ín ku_{in}chjane xuta xi nkú ts'ín kanéhe nga nkúnkú.

⁶ Jun já nts'e, Apolo ko yjoná kuanch-jani_míyahana tu xi chahanu nga najmi tjíhin nga ku_{it}játihuu xi nkú ts'ín tjít'a. Kui nga najmi tu chánka katumahanuu yjonuu ngat'ahá xi tjennkiu ko as'ai najmi n'echj_{ih}i ruu xinkuu.

⁷ At'ahá, ¿yá xi b'a títsu nga ji xi 'yún nda sai ajih_{in} xuta xingisoo? Ngayjee ni xi tjíhin tu kik'aih_íri. Nk'ie nga tu kik'aih_í ri ni xi tjíhin, ¿á chubá chánkahá t_{in}'esjeheni yjoh_i, xi nkúhu tsa najmi tu kik'aih_í ri ni xi tjíhin?

⁸ Jun ja tjínnuu ngayjee ni xi mjenuu. Ja kama nch_{in}ó. Ja tsichumo xi nkú joyaha já rej xi najmi tá machjéhen rá jin. Mjena tsa já rej kju_{ax}i kamo kai, tu xi b'a ts'ín ko jin sakút'ahan_i xánuu nga tá ku_{at}exumai.

⁹ At'ahá b'a mana nga jin xi tí'min_i já postru Ntí_{an}á kitsjante nga kama_i xi nkúhu já xi finijé, xi tjín nga n'ek'ien. Ntítsjee ko xuta tibe ni xi tímat'ain.

10 J̄in xi x̄uta ch̄ini tí'mini at'aha Cristo n'exát'aihi, ko jun xi x̄uta nkjink'un kamo nga kis'ejinnuu Cristo. J̄in xi najmi tjínni nga'yún, jun xi tjínnuu nga'yún. Jun nda ts'ín ts'ínkjáinnuu x̄uta, j̄in ch'on ts'ín ts'ínkjáinni.

11 Santaha n̄istjin nd'ai kjintjía tíyai ko santaha ni xi s'j̄ najmi tísakúni. Najmi tjínni najyun, t̄ibich'onjinni ko ch̄uba tinimasún ní.

12 J̄in kjineni yjoni. Ch'on tsuni x̄uta, tunga binchintjía ní xi b'a tsuni tu xi Nt̄ianá nda ts'íinkohō rā, ndaha tsa b'a t̄itsuni. Tjennki unkieni x̄uta, tunga n'e ch̄ukjua ní.

13 Ch'on ts'ín nchjayaneni x̄uta, tunga én ndahá n'ek'óyaihi xi b'a tsuni. Ja tsichu mā xi nkúhu stjé ajih̄in x̄uta asuntee, xi nkúhu ni xi najmi chumi ni chj̄ih̄i rā. B'a tímat'ain santaha n̄istjin nd'ai.

14 Najmi t̄ib'et'ánuu ni xu'bj̄i tsa tu xi tsjahanuu kjuasuba. T̄ib'et'á níná ni xu'bj̄i tu xi t̄itsjaníyáhanuu jun xi ntína xi tjona.

15 At'aha ndaha tsa s'enuu te mij̄ xi kuakúyanuu éhen Cristo, tunga najmi nkjihín na'mi xi s'enuu. An tsichu ma xi nkúhu tsa na'minuu nga y'enijmínuu én nda tsuhu Cristo Jesu, kui xi kits'ínk'íéntu t̄ik'unnuu.

16 Kui b'a maha, t̄ibankihinuu nga ch̄ase ch̄ubayahanú tu xi b'a ta n'ehenu.

17 Kui kjuaha nga t̄its'ínkjísehenuu Timoteo, xi ta kikj'áts'ehē Nda Nt̄ianá. Kui xi xi nkú joyaha ntína xi tjona, xi ma 'yún k'an. Ts'íinkj'átsjennuu xi nkú t̄its'ian nga t̄its'inxát'aha Cristo Jesu, xi nkú ts'ín bakuyá ngayjē n̄inku xi tjín tu má xi t̄jehén ni.

18 Tjín xi chubá t́basin títjuhún ajinnuu at'aha b'a títu nga najmi kfínsenuu.

19 Tunga tsa Ntíaná mjehe, kfínse xatínuu ko skue najmi tu nkú títu jóo. Ta skue nkú tu nk'a xáha xi b'a t́incha tsu.

20 Nk'ie nga Ntíaná batéxumaha xuta, ni xi ts'ín xuto bakúchji nga Ntíaná batéxumaha, najmi ni xi tsu.

21 ¿Má nihi xi mjenuu? ¿A nk'ie nga kfínsenuu, ndjá ts'inkonuu? ¿A ra tu sahá kjuatjo kfínkonuu ko nimakjua kuasenuu?

5

B'i ts'ín tsasehe Pablo kjuaha nda xi t́jñajihín xuta ninku Corinto

1 Kjuaxi nga tínu'yá nga t́jñajinnuu nku xi ta kuihi najúhún t́jñako, ni xi ta santaha xuta xi najmi be Ntíaná najmi ts'ín.

2 ¿Nkú ts'ín nga tsjo tímahanuu xi nkú ts'ín tífi ninku? ¿A najmi t́jín ni nga k'úé babanuu ngat'aha ni xi tímoo ko najmi ta k'úaintehe ruu nga k'úéjñajinnuu nda xi b'a tít's'ín?

3 Ndaha tsa kjin t́jñanuu tunga animanahá tintsubajiun. Kui nga b'a mahana xi nkúhu tsa t́jñajinnuu. Ko xi nkúhu tsa t́jñajinnuu, ja b'a kixian nga najmi nda t́jín ni xi tít's'ín ndo.

4 Nk'ie nga kama ñjakú xi nkúhu tsa an kúátejñajinnuu ko ta k'úéjñajinnuu nga'yúhún Nda Ntíaná Jesu, ngajoho Nda Ntíaná Jesu

5 n'ekjas'ohon ndanindo nda xi b'a tít's'ín. B'a ts'ín katatsuhun yjoninte ngatitsuhun tu xi n'ek'ankihi animaha ndo nístjin nga k'jáaí ngáha Nda Ntíaná Jesu.

6 Ngat'a ts'e xi nkú ts'ín tintsu_{oo}, ¿nkú ts'ín nga tsjo tímahanuu nk'ie nga t'n'ekjóh_{oon} nda xi b'a títs'íun? ¿A najmi yanú nga kutin na'yu san ts'ínsanyje na'yu nínku_{on}?

7 Ngatitsuhun ndo, kui xi nkú joyaha na'yu san. Títs'ínkatsún_{nuu} ngatitsuhun. Chjúxiun ndo xi nkú ta ts'ín xuta xi ntjehe judio tjehe_n ra nga kjexín na'yu soon kintehe ni nga k'uasje S'í Pascua. At'aha Cristo ja k'ienntjái ngandaná, kui xi chutsankaha S'í Pascuaná ko jun xi nkú joyaha na'yu tsetse xi najmi ta tji_{hin} ra na'yu san.

8 Kui b'a maha, n'esjekohóná S'íu nínku_{an} xi najmi tji_{hin} na'yu san. Kui xi tsuh_u ra nga najmi ta kas'ejnájinná kju_{angak}'un ko kju_{ach}'onk'un. Tu sa ní je kas'eyaná ko nax_u.

9 Xujun xi ja kits'inkjín_{uu} b'a kixinnuu nga najmi tu n'engujinkoo yjonuu xuta xi fantuko jminchjín nga najmi kjee bixan.

10 Tunga najmi xuta xi najmi behé Ntíaná kinch-jajih_{in} nga b'a kixian. Ta ndaha xi 'yún mjehe toon, ta ndaha xi ts'ín ndyjé, ko ta ndaha xi ts'intsjoh_o ntia xi ntsja xuta ts'índaha. At'aha tsa najmi ku_{intsu}bajihuun xuta xi b'a ts'íun, tji_{hin} ni nga kuitju ei asuntee ma.

11 Nk'ie nga kits'inntún_{uu}, b'a kixinnuu nga najmi tu n'engujinkoo yjonuu xi chuba já nts'eé ts'ín ma yjoh_o tunga jminchjih_{in} fantuko ngá, ko tsa xi 'yún mjehe toon, ko tsa xi ts'intsjoh_o ntia xi ntsja xuta ts'índaha, ko tsa xi nchja én ch'on tsu, ko tsa xi ma ch'i, ko tsa xi ndyjé ts'ín. Xi chuba já nts'ehé ts'ín ma yjoh_o tunga b'ahá ts'ín ngá, santaha ni_{ñu} najmi tu chinekoo.

12 At'aha an najmi tjehe_nna nga kuasehe tsa tjehe_n je ko tsa najmi tjehe_n je xuta xi najmi ninku nchjaha ra. Tunga máha jun, ¿a najmi tjihín ni nga chasohó ni xi tíma aya ninku?

13 Kui nga tiyú tjennkihinu nda ngatitsuun. Xuta xi najmi ninku nchjaha ra bi, Ntiana tjehe_n ra nga kuasehe tsa tjehe_n je ko tsa najmi tjehe_n je.

6

B'i ts'in tsakúya Pablo xi nkú ts'in tji_n nga s'enda nku kjuasti ajih_n xuta ninku

1 Tsa kjuasti sakúkoho xinkjín já nts'eé, ¿á ma k'un fisehe ra já jue xi najmi benkjúhun Ntiana tu xi k'úendaha kjuaha, antehé ni nga xuta xi s'ejih_n Ntiana nguaisehe ra?

2 ¿A najmi yanú nga xuta xi s'ejih_n Ntiana kuasehe ni xi nda ko tsa xi najmi nda xi kits'in xuta xi tjin asuntee ndyjun nkiní? Tsa jun xi b'a n'oo, ¿nkú ts'in najmi kamanuu k'úendahanu nku ni xi najmi 'ni tjin?

3 ¿A najmi yanú nga ta santaha ntítsjee chaseéhe mí nihi xi kits'in? Kui nga tji_n nga kamahaná k'úendaá kjuasti xi sakúná asuntei.

4 Kui nga tsa tín'ekokjuahanu xinkju ngat'aha kjuasti xi tjin asuntei, ¿á já xi najmi yankjúhun ajih_n xuta ninku tibankísehe ruu nga k'úendaha kjuanu?

5 B'a tíxinnuu tu xi kama subahanuu. ¿A najmi tji_n ajinnuu nku xi nkjink'un, xi kamaha k'úenda kjuá xi tjin_{ko}ho xinkjín já nts'eé?

6 Tu sa ní nginkun já xi najmi s'ejih_n Ntiana tíncha ts'ínkokjuá xinkjín já nts'eé.

7 Nga ta juhun tjin_{konuu} kju_{asti} xinkiu tsuhu ra nga ja tindyajinnuu. ¿Á najmi tu sahá tín'e chúkjuahanu ni xi najmi b'a tjin xi tín'enuu? ¿Á najmi tu sahá tí'baintehenu nga n'ehenuu ndyjé?

8 Tunga ta juhún ni tín'o ni xi najmi b'a tjin ko ndyjé. Najmi xuta xi kja'ái xi b'a tín'oho. Já nts'ehé ní xi b'a tín'oho.

9 ¿A najmi yanú nga xuta xi najmi naxu ts'in nginkun Ntíaná, kui xi najmi kama kjuas'enjin nga Ntíaná kuatéxumaha? Najmi tu ch'anachoho yjonuu. Xi fantuko jminchjin nga najmi kjee bixan, xi ts'intsjoho ntia xi ntsja xuta ts'inndaha, xi najmi benkjún kjuabixahan, já no ya,

10 xi ts'in ndyjé, xi 'yún mjehe toon, xi ma ch'i, xi ch'on ts'in nchjane xuta, ko xi b'anachaha xuta nga kje'áha ni xi tjihin, ngayjee xi b'a ts'in najmi kama kjuas'enjin nga Ntíaná kuatéxumaha.

11 Kui ni xu'bi kits'in k'ua xi tjin ajinnuu nistjin nk'ie, tunga nd'ai ja kisanéjnunuu. Ntíaná ja kikj'áts'enuu. Ja naxu tsichumo nginkun Ntíaná ngat'aha ni xi kits'in Nda Ntíaná Jesucristo ko ngat'aha Espirituhu Ntíaná.

B'i ts'in tsakúya Pablo nk'ie nga Ntíaná ts'e yjon-intená

12 “Ma ts'ian tu mí nihí ni”, tsu xuta. B'a tjin, tunga najmi ngandanáá ngatentee niu. Ndaha tsa ma ts'ian tu mí nihí ni, tunga najmi tsjantéhé ra tsa tjin nku ni xi kjé'yúnna nga ts'iints'ena.

13 “Nichinee kants'á tjehe_n ra ko kants'á tjehe_n ra nichinee”, tsu xuta ko b'a tjin kjáihin, tunga Ntíanáhá ts'iínkatsún nga joo niu. Najmi kui xáha yjonintená tsa tu chuba súntukonáá xinkia. Tíjña

ní tu xi Nda Nt̄ianá kama ts'ehe ko tu xi ts'íhin xáha Nda Nt̄ianá.

¹⁴ At'aha nga'yúhūn Nt̄ianá kits'ínkj'áiyako_{ho} Nda Nt̄ianá ngabayoo, ko ñá bi, nga'yúhūn ta ts'íinkj'áiyakoná ngabayoo.

¹⁵ ¿A najmi yanú nga nku te ninku nga nkúnkú jun ko nga ninku kui xi yjonintehe Cristo? ¿A nda tjin tsa nku te ninkuhū Cristo kamangujinko nku naská? Najmi. Ndaha tsa mí yeje.

¹⁶ ¿A najmi yanú nga xi ts'ínko nku naská, kui xi nkuhú bichú mako yjonintehe naskóo? At'aha b'i ts'ín tjt'a éhen Nt̄ianá: “Nkuhú yjoninte kuichú ma nga joo.”

¹⁷ Tunga xi nkuhú ts'ín mako yjoho Nda Nt̄ianá, kui xi nkuhú bichú mako Espirituhū Nda Nt̄ianá.

¹⁸ Kui nga t̄iyú t'axíhin ruu ngayje t̄íkjá ni xi ts'ín nga chubá fantukohó xinkjín xuta. Tu má ngatit-suhún ni xi ts'ín xuta najmi fas'enjin yjonintehe, tunga xi chubá fantukohó xinkjín, kui xi ts'ín nku ngatitsun xi ts'ín chuntí yjonintehe.

¹⁹ ¿A najmi yanú nga yjonitenuu xi ninkuhū Espiritu Santo xi t̄ijn̄ajinnuu, Espiritu xi kitsjánuu Nt̄ianá? Najmi ta ts'ajuhunnu yjonuu.

²⁰ At'aha kis'echj̄int̄jainuu nga kich'atsenuu. Kui nga chankj̄únkohonu yjonitenuu Nt̄ianá.

7

B'i ts'ín tsakúya Pablo ngat'a ts'e nga k'úéntuko xinkjín xuta

¹ Kuinchjako ma ngánuu nd'ai ngat'aha ni xi kichasjaiyanú nga kin'e nibánú xujun. Nda tjin tsa nku nda najmi kuixan.

² Tunga tu ngat'aha ní nga ma mjehe nga chuba kjúántukohó xinkjín xuta, kui nga tu sahá kat'entukohó chjuún jáx'iun ko nga jminchjún kas'ehe x'in.

³ Xi tí'mi x'in najmi tu kat'échoho yjoho chjuúhun nga kjúájñako, ko xi tí'mi chjuún najmi tu kat'échoho yjoho x'ihin nga kjúájñako.

⁴ At'aha xi tí'mi chjuún najmi ta kui batéxuma subaha ra yjoho. Ko ní x'ihin batéxumaha yjoho. B'a ta tjín ts'e xi tí'mi x'in. Najmi ta kui batéxuma subaha ra yjoho. Ko ní chjuúhun batéxumaha yjoho.

⁵ Najmi tu b'ech'ohoo yjonuu xinkiu, nku tu-tuhú tsa tse mjenuu chubakoo Ntjaná. Tunga t'endako titjunnú xinkiu tu xi tu chubaha nistjin najmi chjúngajnuhunu xinkiu, askahan chjúngajnu ngáhanu xinkiu. At'aha tsa najmi chjúngajnu xinkiu, kjút'ayák'unnuu ndanindoo nk'ie nga najmi kama 'yúhunnuu.

⁶ Tíb'ejná ndáinnuu tsa b'a n'oo. Najmi kjuayún títs'ihinnuu kui nií.

⁷ Mjena kai tsa ngatentee xuta k'úentu suba xi nkúhu an, tunga kj'ai kj'aihí kjuanda xi kitsjáná Ntjaná nga nkúnkáá. Najmi tu nku chuba kjuanda xi kik'ainá.

⁸ Ngat'a ts'e xi najmi kjee bixan ko jminchín xi ja k'ien x'ihin, b'a tíxian nga nda tjín tsa k'úentu suba xi nkúhu an.

⁹ Tunga tsa najmi kama 'yúhun nk'ie nga mjehe nga chjúngajnu, tu sahá incha katixan. At'aha tu sahá nda tjín nga kuixan tsa ch'on ts'in kuinchja animaha.

10 Ngat'a ts'e xi ja tsixan títsjahā kjuatéxuma xu'bj, kjuatéxuma xi najmi an ts'an, xi Nda Ntíaná ts'e. Xi tí'mi chjuún najmi tu kat'éjña x'ihin.

11 Tunga tsa ni xi tób'ejñaha x'ihin, najmi ta katixahan ko tsa kanchjakonda ngáha. Ko xi tí'mi x'in najmi tu kat'éjña chjuúhun.

12 Ngat'a ts'e xi tjíntuko xinkjín nga s'ejihin ko xi najmi s'ejihin Ntíaná, an xi b'a tíxihin, najmi Nda Ntíaná xi b'a ts'in tíbatéxumaha. Tsa nku nda nts'eé tíjñaha chjuún xi najmi s'ejihin Ntíaná ko tsa yuhu chjuúhun nga k'úejñakoho, najmi tu kat'éjña.

13 Ko tsa nku tachjuún tíjñaha x'in xi najmi s'ejihin Ntíaná ko tsa yuhu x'ihin nga k'úejñakoho, najmi tu kat'éjña.

14 At'aha nda xi tí'mi x'in xi najmi s'ejihin Ntíaná, fát's'ehe Ntíaná tu ngat'aha chjuúhun xi s'ejihin. Ko tachjuún xi najmi s'ejihin Ntíaná, fát's'ehe Ntíaná tu ngat'aha x'ihin xi s'ejihin. Tsa najmi b'a maha niu, najmi je ntíhi nginkun Ntíaná. Tunga nd'ai Ntíaná ja ts'e ntíhi.

15 Tunga tsa xi najmi s'ejihin Ntíaná mjehe k'úejña xi s'ejihin, tsa x'ihin ko tsa chjuúhun maha, najmi tjihin kjuá'yún nda nts'eé ko a ra nichjaá nga k'úejñako xi najmi s'ejihin Ntíaná. At'aha Ntíaná mjehe nga s'ená kjuajyu nga kuintsubaá.

16 At'aha, ¿nkú n'e yahani ji xi tí'mihi chjuún tsa kujnejhi x'ihin? ¿Ko nkú n'e yahani ji xi tí'mihi x'in tsa kujnejhi chjihin?

B'i ts'in tsakúya Pablo nk'ie ngajajáts'ená Ntíaná, kui xi 'yún chjihin ra

17 Tunga tjihín ni nga kat'entu nga nkúnkú xuta xi nkú ts'in kitsjahā Ntíaná ko kat'entu xi nkú ts'in

tj́ntu nk'ie nga Nt̃ianá kinchjaha nga kjuáts'ehe. Kui kjuatéxuma xu'bi xi tsjaha ngayjee xuta ninku.

18 Xi Nt̃ianá kikj'áts'ehe nk'ie nga ja kin'ehe ni circuncision, najmi tu katjántaha ra yjoho. Kó xi Nt̃ianá kikj'áts'ehe nk'ie nga najmi kjee n'ehe ni circuncision, najmi tu kats'ín ni circuncision.

19 Najmi chumi ni ts'íihin tsa kin'ená kó tsa najmi kin'ená ni circuncision. Nk'iehé nga n'etjusaán kjuatéxumaha Nt̃ianá, kuihí xi chj́hi ra.

20 Kat'entu saha nga nkúnkú xuta xi nkú ts'ín tj́ntu nk'ie nga Nt̃ianá kinchjaha nga kjuáts'ehe.

21 Tsa ja tsaténahi jóo nk'ie nga kikj'áts'ehi Nt̃ianá, najmi tu fantaha ri yjohi. Tunga tsa tísakú n'yáhi nga kama ndaíhi yjohi, b'a n'ei.

22 At'aha xi kich'ats'e nk'ie nga Nt̃ianá kikj'áts'ehe, kui xi ja ndaíhi yjoho nginkun Nda Nt̃ianá. B'a ta tj́n ts'e xi ndaíhi yjoho nk'ie nga Nt̃ianá kikj'áts'ehe. Kui xi xuta musuhu Cristo nd'aj.

23 Tse chj́ xi kis'echj́ nga kich'atsenuu, kui nga najmi tu xuta musuhu xuta n'e mahanu yjonuu.

24 Kui b'a maha, já nts'e, xi nkú ts'ín tintsuboo nk'ie nga Nt̃ianá kitsúyanuu nga kjuáts'enuu, b'a ts'ín tintsuba sahanu nginkun Nt̃ianá.

B'i ts'ín basehe Pablo ngat'a ts'e tsa kuixan xuta ninku kó tsa najmi

25 Ngat'a ts'e xi tj́ña xunkú najmi tj́inna nku kjuatéxuma xi kitsjá Nda Nt̃ianá xi tsjaha. Tunga xínyahanuu xi nkú ts'ín ts'innkj́hin k'an. At'aha Nt̃ianá tsase nimana nga kits'ín mana nku xi ma n'e s'ejihin ni xi tsu.

26 B'a mana nga nda tjin nga kat'entu saha xuta xi nkú nga ts'in tjintu tu ngat'aha kjuanimá xi tjin nd'ai.

27 ¿A tijnahi chjuún? Najmi tu binchisjái niyái xi nkú ts'in k'úejñai. ¿A najmi tjihin chjuún? Najmi tu binchisjái niyái nga kuixain.

28 Tsa tibixain, najmi ngatitsun tín'ei. Kó tsa nku takjin xunkú tibixan, najmi ngatitsun títs'in. Tunga xi kuixan s'ehe kjuasti xi tjin asuntee. An bi, najmi mjena tsa kuitjájiun kui niu.

29 Jun já nts'e, ni xu'bi xi mjena xinnuu. Tu chubahá nistjin tijná sa. Kui nga nistjin xi ndyja saha, xi tjihin chjuún kats'in xi nkúhu tsa najmi tjihin.

30 Xi tíntá kats'in xi nkúhu tsa najmi tíntá. Xi tsjo tjihin kats'in xi nkúhu tsa najmi tsjo tjihin. Xi tib'atse tsa mí nihi, kats'in xi nkúhu tsa najmi kui ts'e niu.

31 Kó xi títs'inchjén tsa mí nihi, kats'in xi nkúhu tsa najmi kui niu xi 'yún chjí. At'aha ndyja asuntee xi tíyaá nd'ai.

32 Mjena nga najmi kjuántaha ruu yjonuu. Xi tijná xunkú, kui xi ni xi ts'e Nda Ntjaná fántaha ra yjoho kó xi nkú ts'in ts'ín ni xi tsjoho Nda Ntjaná.

33 Tunga xi tijnaha chjuún, ni xi tjin kui xi fántaha ra yjoho kó xi nkú ts'in ts'ín ni xi tsjoho chjuúhun.

34 B'a ts'in najmi nkúhu ni xi kjintaha ra. Nku tachjuún xi najmi tjihin x'in kó a ra takjin xi tijná xunkú, kui xi fántaha ra yjoho ni xi ts'e Nda Ntjaná kó xi nkú ts'in kama je yjonintehe kó animaha. Tunga tachjuún xi tijnaha x'in, ni xi tjin kui xi

fántaha ra yoho ko xi nkú ts'ín ts'ín ni xi tsjoho x'ihin.

³⁵ Ngandanuu b'a tíxihinnuu. Najmi mjena tsa ch'á ts'ink'anjinuu. Mje nína nga nda n'e kuintsuboo ko n'ekjas'en sisihuun yjonuu Nda Ntíaná.

³⁶ Tsa tjín xi b'a maha nga najmi títs'íntjusunko ni xi y'éndako takjín xi ja tjíndakoho, ko tsa ja tí'a núhu takjín ko b'a maha nga tu sahá nda tjín nga kujxanko, kats'ín xi nkú ts'ín tíma mjehe. Katixan. Najmi ngatitsun niu.

³⁷ Tunga xi tjínkuhu k'un nga najmi kujxan ko chúkjuaha ts'ín jnenta yoho nga chjuún ma mjehe, ko ma 'yúhun nga b'éch'oho yoho, ko ja kits'ínnkjink'un sisin nga tu sahá nda tjín nga najmi kujxan, nda tjín nga najmi kujxan.

³⁸ Kui b'a maha, xi kujxankoho xi tjíndakoho, nda ts'ín. Tunga 'yún nda tjín sa ni xi ts'ín xi najmi kujxan.

³⁹ Nku tachjuún xi tjíñaha x'in, kui xi tjít'a'yúnko x'ihin nk'ie nga tjíña sa. Tunga tsa kuayá x'ihin, kama ndaí ngáha ra yoho ko kama k'úéjñako ngáha xi mjehe, tsa nku xi ta s'ejihin Ntíaná k'úéjñako.

⁴⁰ Tunga b'ahá xian nga 'yún nda ts'ín k'úéjña tsa najmi ta k'úéjñakoho x'in. B'a ts'ín ts'innkjihin k'an ko ndzjen mana nga ta tjíñajinna Espirituhu Ntíaná nga b'a tíxian.

8

B'i ts'ín tsakúya Pablo ngat'a ts'e nichine xi chje 'baihi ntia xi ntsja xuta ts'ínnda

¹ Kuinchjako ma ngánuu nd'ai ngat'a ts'e nichine xi chje 'baihi ntia xi ntsja xuta ts'ínnda. Ja yaá nkú tjihin ra ngat'a ts'e kui ni. Tunga ni xi be xuta, kui xi ts'in ngak'uhun. Kjuatjoo bi, kui xi tsjá nga'yúhun xuta.

² Xi b'a maha nga be tsa mí nihi, kui xi najmi kje be xi nkú ts'in tjihin nga skue.

³ Tunga xi tjoho Ntjaná bi, Ntjaná be yáha xuta xu'bo.

⁴ Kui b'a maha, ngat'a ts'e tsa ma chine nichine xi chje kik'aihi ntia xi ntsja xuta kits'índaha, yaá nga ntia xu'bo najmi chumi ni chjhi ra ko nga nku tutuhú maha Ntjaná. Najmi tjin sa kjaí.

⁵ Kjuaxi nga tjin nk'a jan ko t'anankiu xi ntia tsuhu xuta, ko santaha nkjin maha xi 'mi ntia ko nkjin maha xi chuba yankjúhun.

⁶ Ná bi, nku tutuhú maha Ntjaná. Kui xi Ntia Na'miu xi kits'ínnda ngayjee ni xi tjin ko at'aha mjehe kui nga tintsubahaná. Ko ta nku tutuhú maha Nda Ntjaná, kui xi Jesucristo xi ngat'aha tjihin ni xi tjin ko xi ngat'aha tintsubahaná.

⁷ Tunga najmi ngatentehé xuta be ni xu'bi. Tjin xi ja kama nkaha ntia xi ntsja xuta ts'índaha. Tsa xuta xu'bo kjine nichine xi chje kik'aihi ntio, tu sa b'ahá tsu ngá kjuankjintak'uhun nga ja chuntí kama nginkun Ntjaná, at'aha najmi ndjá tjya kjuankjintak'uhun.

⁸ Kjuaxi nga najmi ngat'aha ni xi chineé binchúk'un tiñahá Ntjaná. Najmi 'yún nda kama saá tsa chineé ko najmi 'yún ch'onk'un kama saá tsa najmi chineé.

⁹ Tjña ndáinu ni xi ma chino, tunga chasenú

nga ni xi chino najmi ts'ínndyjajihin xuta xi najmi ndjá tíncha.

¹⁰ At'aha tsa nku xi najmi ndjá tjíya kjuankjintak'uhun skuehi ji xi ja yai ni xu'bi nga kabinchin nku ante má yankjún ntia xi ntsja xuta kits'índaha ko nga tíchinei ni xi tjín yo, ¿a najmi kohó kui kama k'un kjine ni xi chje kik'aihi ra ntia xu'bo?

¹¹ B'a ts'ín ngat'aha ni xi yai ndyjaha nda nts'eé xu'bi xi najmi ndjá sjña, xi Cristo k'ienntjáhi.

¹² Nk'ie nga b'a ts'ín tín'ekatsúnjiun kjuankjintak'uhun já nts'eé xi najmi ndjá tíncha, ngatitsun xi tífi kontraha já nts'eé tín'o ko ta xi tífi kontraha Cristo.

¹³ Kui b'a maha, tsa ngat'aha nichinena títs'inkijnejihinna ngatitsun nda nts'é, tu sahá ndaha nku nistjin najmi ta kjínehena yjo, tu xi b'a ts'ín najmi ts'inkijnejihinna ngatitsun nda nts'é.

9

B'i ts'ín tsasinntjai yjoho Pablo nga kjuaxi nga nda postru

¹ ¿A najmi kamahá ts'ian ni xi ts'ín nku nda postru? ¿A najmi nda postruná? ¿A najmi tunkáhán kikiokohona Nda Ntíaná Jesu? ¿A najmi juhún nga chjihí xá xi títs'ian nga Nda Ntíaná títs'in xáha?

² Ta ndaha tsa tjín xi najmi ts'ínkjáihin nga an xi nku nda postru, tunga jun tjíhin nga n'ekjáinnú. At'aha nd'ai nk'ie nga s'ejinnu Nda Ntíaná, kui niu xi bakúchji nga kjuaxi nga an xi nku nda postru.

³ B'i ts'ín básintja yjona nginkun xuta xi b'aya xána.

⁴ ¿A najmi kamahá n'ekjáihin an ko Bernabe ni xi chinej ko ni xi s'i?

⁵ ¿A najmi kamahá nga s'ejñani chjuún xi s'ejihin Ntjaná, xi tsjénkonj nga kujinimai xi nkú incha ts'ín já postru xingisoo ko já nts'e Nda Ntjaná ko Pedro?

⁶ ¿A tu nkuhú an ko Bernabe tjíhinni nga n'exái tu xi sakúhuni ni xi machjénni?

⁷ Nku nda jun, ¿a kuihí b'échjí ni xi fet'aha nga ts'ín xáha? Xi b'éntje tuntsajé, ¿a najmi kjinehé tuu? Xi kunntá chutsanka, ¿a najmi yohó sakút'aha ni xi kjine?

⁸ ¿A kjuankjintak'un ts'ahán tíb'asjéhena ni xi tíxian? ¿A najmi b'ahá ta ts'ín tjít'a kjuatéxumoo?

⁹ At'aha b'a ts'ín y'ét'a Moise xujun kjuatéxumoo: “Najmi tu tsa b'e'ohoo turu tsa tu xi najmi kjinehe tuniñu nk'ie nga títs'ínxá nga tíbitjía tuniñu.” ¿A turuhú kjintaha ra Ntjaná?

¹⁰ ¿A najmi ngandanáhá b'a kitsú? Johon, ngandaná b'a ts'ín kis'et'aha kjuatéxumoo. At'aha xi bakján t'anankiu ko xi bitjía tuniñu, kui xi tjíhin nga kúyaha nga ta sakút'aha chon.

¹¹ Kui kjuaha, tsa jin tíb'entjeheni ajinnuu ni xi ts'e Ntjaná, ¿a tsehé ni xi tíbinchij tsa ta sakút'ani chuba chahan ni xi tjínnuu ej asunntej?

¹² Tsa kj'ai ma sakút'aha ni xi tjínnuu, ¿a najmi 'yuhún tsuhuni nga sakút'ani ni xi tjínnuu? Kamani kujinchíj, tunga najmi b'ahá tín'ej. Ni xi n'e níj, n'e chúkjuaj ngayjee ni xi mat'ain tu xi najmi chumi ni k'uéch'oho ra xuta én nda tsuhu Cristo.

¹³ ¿A najmi yanú nga xi ts'ínxá ninku kjine ni xi masún ninku ko xi ts'ínxát'a nachan chje ta

sakút'ahā yjohō chū xi n'ek'ien yō?

¹⁴ B'a tā ts'ín y'éndā Ntīanā nga xi b'énijmí én nda tsuhū, én xi k'uénijmí k'úéntuhu. Yō sakúhu rā ni xi kjine.

¹⁵ Tunga an ndahachí najmi tíbankia ni xi tjíhin nga kanéna kai. Kō tā ndaha najmi títs'inntúnū tsa tū xi ni k'uáihinú. Tū sa ní nda tjín tsa kuayá kintehe ni nga tū nku k'uáihina ni, at'ahā tsjo tjínna nga najmi chumi ni tí'báina.

¹⁶ Nk'ie nga túb'enijmíá én nda tsuhū Jesucristo, najmi kui kjuaha tsa nk'a k'uasjéhana yjona. At'ahā ja tjínena nga b'a ts'ian. ¡Nima rú ts'ihinna tsa najmi k'uenijmíá én nda tsuhū Jesucristo!

¹⁷ Kui b'a maha, tsa xá an mjehena k'uenijmíhina én nda tsuū, ts'inkjáihín chjína. Tunga tsa tjínena nga k'uenijmíá, a xá xi kik'áihina títs'ian ma.

¹⁸ Kui nga, ¿mí chjíhi xi ts'inkjáihín rā ma? Chjína nga najmi f'achjá nga b'énijmíá én nda tsuhū Jesucristo kō nga najmi bankia ni xi kanéna ngat'ahā nga túb'enijmíá én nda tsuū.

B'í ts'ín kitsúya Pablo ni xi ts'ín nga ts'ín xáha

¹⁹ Ndaha tsa ndáina yjona, tunga jahá kits'in ma yjona nku ndā musuhū ngayjee xuta, tū xi b'a ts'ín nkjin xuta ts'in ngana sahana nga kuak'já éhen Cristo.

²⁰ Ajihin xuta xi ntje judio tjeheñ rā b'a ts'ian xi nkú ts'ín xuta xi ntje judio tjeheñ rā, tū xi ts'ín nganahana kui xuto. Ndaha tsa an najmi tjíñanena kjuatéxuma xi kin'ekjas'ehen Moise, tunga ajihin xuta xi tjíñanehe kjuatéxumoō b'a ts'ian xi nkú ts'ín xi tjíñanehe kjuatéxumoō, tū xi ts'ín nganahana kui xuto.

²¹ Ajiñin xuta xi najmi tijnanehe kjuatexuma xi kin'ekjas'eheñ Moise b'a ts'ian xi nkúhu tsa ko an najmi tijnanena kjuatexumoo, tu xi ts'in nganahana xuta xi najmi tijnanehe kjuatexumoo. Tunga najmi tijná t'axihín ra kjuatexumaha Ntjaná, at'aha kjuatexumaha Cristo tijnajihin.

²² Ajiñin xuta xi najmi ndjá tijncha nginkun Ntjaná b'a ta ts'in ts'in ma yjona, tu xi ts'in nganahana xuta xi najmi kje ndjá tijncha. Ts'in ma yjona xi nkú k'un ngayje tikjá xuta tu xi tjin xi k'uankihi.

²³ B'a tít's'ian at'aha xaha én nda tsuhu Jesucristo tít's'ian ko tu xi ta sakúhuna kjuanda xi tsjá.

²⁴ ¿A najmi yanú, nk'ie nga nkjin maha xi bangatsanka, nkuhú xi ts'in ngana? Kui nga tiyútsanka sisihinnu tu xi kama n'ekjáhín ruu chjí xi k'uainá.

²⁵ Ko xi b'énda yjoho nga tsúton, nkjin ni xi b'éch'oho yjoho. B'a incha ts'in tu xi kama ts'ínkjáhín ra nku chjí xi batsun. Tunga ñá bi, tib'endaá yjoná tu xi n'ekjáhín raá nku chjí xi najmi maha batsun.

²⁶ An bi, najmi tibangatsanka xi nkúhu xi chuba tibangatsankahá ko najmi tikjan xi nkúhu xi chuba tib'éjin séhen.

²⁷ Tu sa ní títsjaha kjuanima yjonintena ko tít's'ink'a niyá, tu xi najmi ndyjahana an xi y'enijmíhi xuta xingisoo.

10

B'i ts'in tsakúya Pablo nk'ie nga kits'ínchén ni xi kamat'ain ntje cháha xuta judio

¹ Jun já nts'e, najmi mjena nga n'echayo ni xi kamat'ain ntje cháha xuta judio. Ngayjee y'ema kintehe ninti xi kitsjániyáha ko ngayjee j'atikjá ntáchak'uun.

² B'a ts'in ngayjee nkuhú kamakoho Moise nga kisaténtájin nintiu ko ntáchak'uun.

³ Nkuhú nichine xi kitsjáha Ntíaná incha kikjine ngayjee

⁴ ko nkuhú ntá xi kitsjáha Ntíaná incha kik'i ngayjee. Incha kik'i ntánijua xi tsitjuhu nku naxi xi kitsjáha Ntíaná. Kui naxiu xi Cristo ko kui naxiu xi kitsjenkoho.

⁵ Tunga ndaha tsa b'a kama, najmi kisasihin Ntíaná xi nkú ts'in y'entu nkjin xuto. Kui kjuaha incha k'iehen ante kixiu.

⁶ Ni xi kamat'ain xuta xu'bo kis'ejña chubayaná, tu xi najmi n'e mjehená ni xi najmi nda xi nkú ts'in kits'in mje xuta xu'bo.

⁷ Najmi tu n'etsjohoo ntia xi ntsja xuta ts'innda xi nkú kits'in k'ua xuta xu'bo, xi nkú ts'in tjít'a éhen Ntíaná: "Y'entu xuta nga kikjine ko kik'i ko askahan incha tsisintjen nga kitenki tsjo."

⁸ Najmi tu chuba suntukonáá xinkia xi nkú kits'in k'ua xuta xu'bo. Kui kjuaha k'iehen kan jan mij nga nkuhú nistjin sa.

⁹ Najmi tu chjut'ayák'aán Nda Ntíaná xi nkú kits'in k'ua xuta xu'bo. Kui kjuaha k'iehen nga kikjinehe ra ye.

¹⁰ Najmi tu chubayanó Ntíaná xi nkú kits'in k'ua xuta xu'bo. Kui kjuaha nga ntitsje xi ts'inkje xuta kits'ink'iehen ra.

¹¹ Ni xu'bi xi kamat'ain ntje cháha xuta judio, kui xi kis'ejña chubayaná. Xujun éhen Ntíaná kis'et'a

niu tu xi tsjániyáhaná ñá xi tintsubaá nd'ai nistjin xi fekuu.

¹² Kui b'a maha, xi ts'innkjink'un nga najmi kujnenki, kakuhun yoho tu xi najmi kujnenkihi.

¹³ Ni xi tímat'on nga tíchjut'ayák'unnuu najmi ts'ati sa nga ni xi mat'ain xuta. Ma ma 'yún tak'aán Ntíaná. Najmi tsjánte tsa 'yún chjút'ayák'un sanuu nga kj'uaínenuu nku ni xi najmi kuichjúkjuanu. Tsjániyá nínuu xi nkú ts'ín kuitjunkihinu nk'ie nga chjút'ayák'unnuu, tu xi b'a ts'ín n'e chúkjuahanu ni xi nibanenuu.

¹⁴ Já nts'ena xi tjona, kui nga tankín t'axíhin ruu ntia xi ntsja xuta ts'índaha.

¹⁵ Tíinchjakonuu xi nkúhu xuta xi be ni xi ts'ín. N'enkjínk'un sisiun ni xi tíxinuu.

¹⁶ Nk'ie nga 'yaá binu nkjúun nga 'bajíhi máb'achjíhi Ntíaná, ¿a najmi nkuhú bichú majihín jníhi Cristo? Ko nk'ie nga chineé nínkuan xi bakjanyáá, ¿a najmi nkuhú bichú majihín yjonintehe Cristo?

¹⁷ Nkuhú maha nínkuon, kui nga nkuhú yjoninte bichú mahaná ndaha tsa nkjin mahaná. At'aha ngatenteé sakút'aná nínkuan xi nkuhú maha.

¹⁸ Chase chubayohoo xuta xi ntje Israel tjehe ra. Xi incha kjine yoho chu xi chje 'bajíhi Ntíaná, ¿a najmi nkuhú bichú majihín chje xi s'entusún nachan chje?

¹⁹ Nk'ie nga b'a tíxian, najmi b'a tíxian tsa chjíhi ra ntia xi ntsja xuta ts'índaha ko ta ndaha tsa chjíhi ra yjo xi 'bajíhi chje.

²⁰ Ni xi tíxin níná, chje xi tsjáha ntia xuta, kui xi jánindoo títsjáha. Najmi Ntíaná tsjáha niu. Najmi

mjena tsa tjín ni xi s'ekonuu jánindoo.

21 Najmi kama s'iuyo chuťsín xi ts'e Nda Ntíaná ko ta chuťsín xi ts'e jánindoo. Najmi kama kuĩntsubat'o yámixa xi ts'e Nda Ntíaná ko ta yámixa xi ts'e jánindoo.

22 ¿A ra mjehéná nga kama stihĩ Ntíaná? ¿A 'yúhún tjínná nga'yún nga kama kuankín kontraá Ntíaná?

B'i ts'ín tsakúya Pablo nkjé chineé yjo xi ja kin'e ma chje

23 “Ma ts'ian tu mí nihí ni”, tsu xuta. Tunga najmi ngandanáhá ngayjee niu. “Ma ts'ian tu mí nihí ni”, tsu xuta. Tunga najmi ngatenteehé niu tsjá nga'yúnná.

24 Ndaha nku najmi tu katangisjai ngandaha. Ni xi kama ní ngandaha xuta xinkjin katangisjai.

25 Kama chinoo tu mí yjohó ni xi tjín má satéña yjo. Najmi tu b'a bixiún tsa kui niu xi ts'íinkatsún kjuankjintak'unnuu.

26 At'aha ngayjee asuntee ko ni xi tjíhin, Ntíaná ts'e.

27 Tsa nku xi najmi s'ejihĩ Ntíaná b'a kuĩtsunuu nga kuankín chinoo niñu ni'yaha ko tsa mjenuu kuankiún yo, chinoo tu mí ni xi k'uéjñat'ahanuu. Najmi tu b'a bixiún tsa kui niu xi ts'íinkatsún kjuankjintak'unnuu.

28 Tunga tsa tjín xi b'a kuĩtsunuu: “Ntia xi ntsja xuta ts'ínnaha ja kik'aihi chje yjo xu'bi”, najmi tu chino nk'ie. T'ech'óhoo yjonuu niu tu ngat'aha tsa nkú kamaha xi b'a kuatsúnuu ko tu ngat'aha tsa kuatsún kjuankjintak'uhun.

29 Najmi b'a tíxian tsa kjuankjintak'uhun xi kjine niu kuatsún. Kjuankjintak'un níhi xi b'a kuatsúu tíxian. At'aha, zá xi nkú ts'in tinchjaha kjuankjintak'uhun xuta xi kj'ai chasehe ra nga cha mí nihi xi ma ts'ian?

30 Tsa tsjaha máb'achjíhi Ntíaná at'aha títsjana ni xi tíne, zá kuinchjayanehena xuta tsa kjine ni xi ja kuatsjaha máb'achjíhi Ntíaná?

31 Kui b'a maha, tsa chinoo ko tsa s'iu ko tsa tu mí nihí ni xi n'oo, ngayje ni xi n'oo katakúchji kjuachánkaha Ntíaná.

32 Najmi tu n'o nga ndyjajihin xuta xi ntjehe judio tjeheh ra ko xi najmi ntjehe judio tjeheh ra ko ta ndaha xuta ninkuhu Ntíaná.

33 An bi, tu mí nihí ni xi ts'ian, ni xi sasíhin ngayjee xuta ts'ian. Najmi tu ni xi ngandana bangisja nga ts'ian. Ni xi kama ní ngandaha xuta ts'ian. B'a ts'ian tu xi k'uankihi.

11

1 B'a ta n'oo xi nkú nga ts'ian, at'aha an bi, b'a ta ts'ian xi nkúhu Cristo.

B'i ts'in tsakúya Pablo xi nkú ts'in skuenkjún jminchjún

2 Tsjo ts'in nchjanijmíyahanuu, já nts'e, at'aha tehente f'áitsjennuu an ko at'aha tín'o ni xi tsakuyánuu. Kui ni xi kik'aina ko b'a ta ts'in kits'inkjas'ennuu.

3 Tungá mjehéna nga choo nga Cristo kui xi tjen tíjuhun nga nkúnkú jáx'in, ko xi tí'mi x'in kui xi tjen tíjuhun chjuúhun, ko Ntíaná kui xi tjen tíjuhun Cristo.

4 Tu yá ndahá ni xi k'ué'ma nintaku nk'ie nga kuinchjako Ntíaná ko tsa nga ts'ínkjas'en én xi tsjáha Ntíaná, kui xi najmi tibenkjún xi tjen títjuhún.

5 Ko tu yá tachjuúhún ni xi najmi k'ué'ma nintaku nk'ie nga kuinchjako Ntíaná ko tsa nga ts'ínkjas'en én xi tsjáha Ntíaná, kui tachjúun xi najmi tibenkjún xi tjen títjuhún. Nk'ie nga chasehe raá, b'a joyaha tsa kich'ajnu kaha.

6 At'aha tsa nku tachjuún najmi k'ué'ma nintaku, tu sahá katate ntsjaha. Ko tsa subaha nga kuate ntsjaha ko a ra nga kj'ujnu kaha yjoho, tu sahá kat'é'ma nintaku ma.

7 Xi tí'mi ndax'in najmi tjíhin nga k'ué'ma nintaku. At'aha xi nkú ts'in tjíyaha Ntíaná, b'a ts'in kits'inndaha Ntíaná ndax'in xi tjuun, ko kui ndo bakúchji kjuachánkaha Ntíaná. Tunga xi tí'mi tachjuún, kui xi bakúchji kjuachánkaha xi tí'mi x'in.

8 At'aha ndax'in xi tjuun najmi yjonintehe tachjúun nibaha ra. Tachjuún xi tjuun ní xi nibaha ra yjonintehe ndax'iun.

9 Najmi ngandaha tachjúun kin'endaha ndax'iun. Ngandaha ní ndax'iun kin'endaha tachjúun.

10 Kui kjuaha tjíhin nga k'ué'maha nintaku xi tí'mi tachjuún, tu xi skuenkjúhun xi batéxumaha ko skuenkjúhun ntítsjee.

11 Tunga ajinná xi s'ejinná Nda Ntíaná, tjín xi chjuún at'aha ta tjín xi x'in, ko tjín xi x'in at'aha ta tjín xi chjuún.

12 At'aha xi nkú ts'in yjonintehe ndax'iun nibaha ra tachjuún xi tjuun, b'a ta ts'in nd'ai xi tí'mi tachjuún tsihin xi x'in tí'mi. At'aha ngatentee ni xi

tjín nginkun Ntíaná nibáha ra.

13 N'enkjíntak'un sisiun ni xu'bj. ¿A nda tjín nga nku tachjuún najmi k'u'é'ma nintaku nk'ie nga kuinchjako Ntíaná?

14 Xi nkú ts'ín yaha, tsa nku nda ts'ííndju ntsjaha, ta kui ta maha títsjáha kjuasuba yjoho.

15 Tunga tsjohó tjíhin nku tachjuún tsa ts'ííndju ntsjaha. At'aha kui xi kik'aihi nga ndju kama ntsjaha tu xi k'u'é'makoho nintaku.

16 Tunga tsa tjín xi mjehe k'uésiyáha ni xu'bj, najmi b'a ts'ín nkaní kō ta ndaha najmi b'a ts'ín nkaha xuta ninkuhu Ntíaná.

B'i ts'ín tsakúya Pablo xi nkú ts'ín tjíhin nga n'ekj'átsjen ngabayaha Nda Ntíaná nk'ie nga kama ñjakú xuta ninku

17 Najmi tínchjako tsjo tsjonuu ni xi xínnuu nd'aj, at'aha najmi ngandanuu ma ñjakúkōhonu xinkiu. N'e'un níhi xinkiu nga ma ñjakú.

18 Kui ni xu'bj xi tjun xínnuu. Tí'miyana nga b'i ngjáhán ch'ach'anú xinkiu nga n'esje t'axiún yjonuu nk'ie nga ma ñjakú ninku. Kō santaha tís'ejinna ni xi tí'mina,

19 at'aha tjíhin ni nga ch'ach'anú xinkiu nga n'esje t'axiún yjonuu tu xi chaha yá xi ndjá síjña nginkun Ntíaná.

20 Nk'ie nga ma ñjakúkōo xinkiu, najmi n'o xi nkú ts'ín tsakúyaná Nda Ntíaná nga kikjineko sa já ni'yakuyáha.

21 At'aha nk'ie nga chino, b'i ngján nkúnkú fak'já ni xi ts'e. Tjín xi najmi sakúhu nichinee kō tjín ngá xi ma ch'i.

22 ¿A ra najmi tjiínnuu ni'ya má nga kama chinoo ko s'iu? ¿Á tu ni xi najmi chumi ni chjíhi ra tín'ekohonu xuta ninkuhu Ntíaná ko tí'baihi ruu kjuasuba xuta xi najmi chumi ni xi tjiín ra? ¿Nkú xinnuu? ¿“Nda tín'o”, a xinnuu? Nk'ie nga b'i tín'o, najmi tjiín xi nkú ts'ín “Nda tín'o” xihinnuu.

23 Ta kui ma maha én xi kitsjana Nda Ntíaná, ta kui ma maha én xi tsakuyanuu. B'i kixinnuu: Ta kuihi nistjen nga kin'ekjas'en Nda Ntíaná Jesu, jakj'á ninkuan.

24 Nk'ie nga ja kamaha nga kitsjaha máb'achjíhi Ntíaná, tsakjanya ninkuon ko b'i kitsú: “Kui xu'bi xi yjonintena xi n'ekjas'en ngandanuu. B'i ta n'oo tu xi kj'uaítsjehennuu an.”

25 B'a ta ts'ín jakj'á chutsiun nk'ie nga ja kamaha nga kikjine nichinee. B'i kitsú: “Kui chutsiun tibakúchji jnina xi ja tib'éndako tsetsehe Ntíaná nd'ai xi nkú ts'ín nda ts'ínko xuta. B'i ta n'oo tu xi kj'uaítsjehennuu an xki xki nga s'iu.”

26 Kui b'a maha, xki nga chinoo ninkuon ko s'iyochutsiun, b'aha ra nga kik'atuts'ihin kui nij santa nkúhu nga kj'uai ngaha Nda Ntíaná, tibixinyo nga k'ien.

27 Kui nga tu yáhá ni xi najmi skuenkjühun nga kjine ninkuon ko nga k'úiya chutsiun nga ts'ín xi nkú kitsú Nda Ntíaná, kui xi títsjehen jé nga najmi tibenkjún yjonintehe ko jníhi Nda Ntíaná.

28 Kui b'a maha, kintehe ni nga xuta kjine ninkuon ko nga k'úiya chutsiun, tjiín ni nga katasejin sisin animaha.

29 At'aha tsa tjiín xi chuba kjinehé ko chuba k'úihí nga najmi ts'ínkie yjoho nga yjonintehe

Nda Ntíaná niu, kui xi n'enijéhe ra at'aha chuba tíkjinehé kō tí'bi niu.

³⁰ Kui kjuaha nga tjíhin ajinnuu nkjin xi kjintu'un kō xk'ién kō k'ua xi ja k'ien.

³¹ Tunga tsa chasejin sisihín animaná, Ntíaná najmi ts'ínk'anjiná jé.

³² Nk'ie nga base Ndantíaná tsa nda kō tsa najmi nda ni xi n'eé, yō títsjániyáná tu xi najmi n'enijéhená nistjin nga n'enijéhe xutá xi tjín asuntee.

³³ Kui b'a maha, já nts'ena, nk'ie nga kama ñjakú nga chinoo nichinee, b'i ngján chúyohoo xinkiu.

³⁴ Tsa tjín xi tíma bjoho, ni'yaha kakjine. B'a kats'ín tu xi najmi ts'ínk'a niyáha ra Ntíaná ngat'aha ni xi títs'ín nk'ie nga tíma ñjakúko xinkiu.

Ni xi tjín sa ajinnuu, nk'ie nga kfínsenuu k'uendá.

12

B'i ts'ín tsakúya Pablo nk'ie nga kj'ái kj'ái kjuanda tsjáha Espirituhu Ntíaná xutá ninku

¹ Jun já nts'e, mjena nga choo nga nkjin tíkjá kjuanda xi tsjáha Espirituhu Ntíaná xutá ninku.

² Yo xi nkú n'e tintsuboo nk'ie, nga najmi kjee s'ejinnuu Ntíaná. Xi nkúhu tsa kichju'yúnnuu nga kitsjennkíhuu ntia xi najmi maha nchja, xi ntsja xutá ts'índaha.

³ Kui b'a maha, tíxinyahanuu nga ndaha nku xutá xi Espirituhu Ntíaná títs'ínkinchjaha najmi ma b'a tsu: “¡Najmi nda Jesu!” Kō tá ndaha nku najmi ma: “¡Jesu xi Nda Ntíaná!” tsu, tsa najmi tíñajihin Espirituhu Ntíaná.

⁴ Kǵ'áí kǵ'áí kǵuanda xi 'báihǵ xǵta, tǵnga nkuhú maha Espirítuǵ Ntǵaná xi tsǵáha.

⁵ Kǵ'áí kǵ'áí xá xi maha ts'ín xǵta, tǵnga nkuhú maha Nda Ntǵaná xi tsǵá xáha.

⁶ Kǵ'áí kǵ'áí ni xi maha incha ts'ín, tǵnga nkuhú Ntǵaná xi ts'ín ngayjee niǵ nga ts'ínxáǵinyjehe xǵta nǵnku.

⁷ Nga nkúnkú kik'áihǵ nga Espirítuǵ Ntǵaná kuakúchǵi yjohǵ ngandaha ngayjee xǵta nǵnku.

⁸ Tǵín xi Espirítu tsǵáha nga kuítsuyaha xǵta én xi nanka, kǵ ta tǵín xi ta kuihi Espirítu tsǵáha nga kuítsuyaha xǵta ni xi kamankǵihǵn.

⁹ Tǵín xi ta kuihi Espirítu tsǵáha nga 'yún s'ejihǵn Ntǵaná, kǵ tǵín ngá xi ts'ínkǵihǵ xǵta. Ta kuihi Espirítu xi tsǵáha nga b'a ts'ín.

¹⁰ Tǵín xi maha ts'ín kǵuankǵún, kǵ tǵín ngá xi Ntǵaná tsǵáha éhen, as'ai ts'ínkǵas'en niǵ. Tǵín xi manǵihǵn tsa kǵuaxǵi nga Espirítuǵ Ntǵaná tǵǵnǵahǵn xǵta. Tǵín xi nchǵa kǵ'áí én xi tsǵáha Espirítu, kǵ tǵín ngá xi ts'ínk'atiya én xi tsǵá Espirítu.

¹¹ Nkuhú Espirítuǵ Ntǵaná xi ts'ín ngayjee ni xu'bj. Xi nkú ts'ín mjehe tsǵá niǵ, b'a ts'ín tsǵáha nga nkúnkú xǵta nǵnku.

B'i ts'ín tsakúya Pablo nk'ie nga nkuhú kich'áá xinkǵá nǵa xi xǵta nǵnku

¹² Xi nkúhu yjonintená, nkuhú maha tǵnga nkǵihǵn ni xi tǵihǵn nga tǵǵxanya. Kǵ ngayjee ni xi tǵǵhǵn, ndaha tsa nkǵin maha tǵnga nkuhú yjoninte bichú ma. B'a ta tǵín ngat'a ts'e Cristo.

¹³ At'aha nkuhú Espirítuǵ Ntǵaná kisaténtáhaná ngatenteé kǵ ngayjee kik'ainá nga ki'yaá ta kuihi Espirítuǵ Ntǵaná. B'a ts'ín nkuhú

yjoninte tsichu mahaná, ndaha tsa xutá xi ntje judio tjeheñ ra ko ta ndaha tsa xi najmi ntje judio tjeheñ ra, ndaha tsa xutá musu xi kich'atse ko ta ndaha tsa xi ndaí yjoho.

¹⁴ Nku yjoninte najmi nku ndjuú maha. Nkjin ní ni xi y'ahá ra nku yjoninte.

¹⁵ Tsa b'a kuitsu nku tsukaá: “Najmi yjonintee y'ahana at'ahá najmi ntsa 'mina”, tsa b'a kuitsu, ¿a kui kjuaha nga najmi ta yjonintee y'ahá ra?

¹⁶ Ko tsa nku tjabaxínñjaá b'a kuitsu: “Najmi yjonintee y'ahana at'ahá najmi tunkun 'mina”, tsa b'a kuitsu, ¿a kui kjuaha nga najmi yjonintee y'ahá ra?

¹⁷ Tsa tu subahá tunkun kama yjonintee, ¿nkú ts'ín kuinú'yáhaná? Ko tsa tu subahá tjabaxínñju kama yjonintena, ¿nkú ts'ín kj'uantahaná?

¹⁸ Xi nkú ts'ín kisasíhin Ntjaná, b'a ts'ín y'éntu nga nkúnkú ni xi tjihin yjonintena.

¹⁹ At'ahá tsa nkuhú ni xi tijná, najmi ta yjonintehe ma.

²⁰ Kui nga ndaha tsa nkjin maha ni xi y'ahá ra yjonintee, tunga nkuhú maha yjonintee.

²¹ “Najmi machjénna ji”, najmi tsuhu tunkaán ntsaá. Ta ndaha: “Najmi machjénna jun”, najmi tsuhu nintakaá tsukaá.

²² Tu sa ní má najmi 'yún machjénna yjonintena bixíhaán, tu sa ní kui xi 'yún machjén sa.

²³ Ko xi b'a maná nga kinte tjen, kui xi tu sahá tsjo n'ek'íe saá. Ko má najmi mjená nga kama chji, kui xi b'e'maá,

²⁴ at'ahá najmi machjéheñ nga k'úe'maá yjonintena má nga ma chji bixíhaán. B'a kits'ínk'íe Ntjaná

yjonintená nga 'yún n'echjí saá xi b'a maná nga kinte tjen.

²⁵ B'a kits'ín Ntíaná tu xi najmi kama ngabihi ra xinkjín yjonintená ko tu xi b'i ngján kúhún ra xinkjín.

²⁶ Nga ngayjee ni xi y'ahá ra yjonintená, tsa tjín xi un tibehe, ta un skuéhe xi k'oo. Ko tsa 'yún tíchun saháá nku, ngayjee xi k'oo ta tsjo incha kamahá.

²⁷ Jun xi yjonintehe Cristo. Nga nkúnkú jun, jun xi yjonintee.

²⁸ Ntíaná kitsjá nga s'e ajihín xuta nínku tjun já postru, xi ma johó já profeta xi tsuya én xi Ntíaná tsjáha, xi ma jahan já maestru, ko askahan xi mahá ts'ín kjuankjún, ko xi mahá ts'ínkihi xuta, ko xi be nkú ts'ín kuasínko xuta, ko xi tsjen tíjún, ko xi nchja kj'ai én xi Espirituhu Ntíaná tsjáha.

²⁹ ¿A ngatenteéhé xuta nínku xi já postru? ¿A ngatenteéhé xi já profeta? ¿A ngatenteéhé xi já maestru? ¿A ngatenteéhé xi mahá ts'ín kjuankjún?

³⁰ ¿A ngatenteéhé xi kik'aihi nga kamahá ts'ínkihi xuta? ¿A ngatenteéhé xi kik'aihi nga nchja kj'ai én xi tsjáha Espirituhu Ntíaná? ¿A ngatenteéhé xi mahá ts'ínk'atiya nkú tsuhu ra kj'ai én xi Ntíaná tsjáha xuta?

³¹ Kui b'a maha, ajihín ngayjee kjuanda xi tsjá Espirituhu Ntíaná, n'e mjo xi kjennuu niyá. Tunga xinyahánuu nku xi 'yún kjennuu niyá.

13

B'i ts'ín tsakúya Pablo nk'ie nga kjuatjoo xi 'yún chjí saha

1 Tsa mayjena én xi tjin ko én xi nchja ntítsjee tunga tsa najmi tjihinna kjuatjo, xi nkú joyaha nku ni xi tu tífanehé bichú ma ko a ra nku kicha xi tífanet'áha son xi ch'on ts'in nu'yá nga tín'ekjane.

2 Tsa ts'inkjas'en én xi tsjana Ntjaná, tsa mankinna ngayjee ni xi y'éjña 'ma Ntjaná, tsa be tu mí nihí ni, ko tsa 'yún s'ejinna Ntjaná nga santaha kama ts'inkjí t'axián naxi, tunga tsa najmi tjihinna kjuatjo, najmi chumi ni chjhi ra an.

3 Tsa tsjaha xuta x'an ngayjee ni xi tjinna ko tsa ts'inkjas'en yjona tu xi kuitihi ngandaha xuta xi kj'ai, tunga tsa najmi tjihinna kjuatjo, tu kjuandaha b'a ts'ian.

4 Xi tjihin kjuatjo, kui xi ta tjihin kjuatsenta ko nda animaha. Xi tjihin kjuatjo najmi xintak'un, najmi nchja én ngak'un, najmi nk'a b'asje yjoho,

5 najmi ts'in ni xi najmi sasihin xuta xingisoo, najmi tu ni xi ts'e subahá bangisjai, najmi kitsa ma kjaan, najmi b'éjin tak'un ni xi najmi nda kin'ehe,

6 najmi tsjo maha ni ch'onk'un xi ts'in xuta. Tsjo ní maha ni xi naxu ts'in xuta.

7 Xi tjihin kjuatjo ts'in'yún tak'unyje ni xi f'ajin, s'ejihin ngayjee ni xi ts'e Ntjaná, ma 'yún k'un tehente Ntjaná, ko ts'in chúkjuayje ni xi mat'ain.

8 Najmi kamaha kfeya kjuatjoo. Kuichú nistjin nga najmi ta ts'inkjas'ehe já profeta éhen Ntjaná, ko nga najmi ta tsjaha Ntjaná nga kuinchja xuta kj'ai kj'ai én, ko nga najmi ta kamachjéhen nga cha xi nkú ts'in yaá nd'ai.

9 At'aha tu ichíhi yaá nd'ai ko tu ichíhi ni xi tsuaná já profeta nd'ai,

10 tunga nk'ie nga kuitjusun ni xi tjihin nga kama, nk'iehé kfet'a ni xi tu ichíhi yaá nd'ai.

¹¹ Nk'ie nga ndyjana, kinchja xi nkú ts'ín nchja jántí xī, kits'innkjih̄in k'an xi nkú ts'ín ts'ínkjink'un jántí xī, kō kamankjinna xi nkú ts'ín mankjih̄in jántí xī. Tunga nk'ie nga ja kama chá, y'ejñá t'axián ni xi ts'ín jántí xī.

¹² At'aha nd'ai tu tíya xanáá ni xi ts'e Ntíaná xi nkú joyaha tsa nku chutsín tichaseyaá nga najmi nda ts'ín tíyaá, tunga kuichúhú nistjin nga chá sisián Ntíaná. Nd'ai chuba be, tunga kuichúhú nistjin nga skue sisian. B'a ts'ín skue xi nkú ts'ín bena.

¹³ Najmi maha feya nga tís'ejinná Ntíaná kō nga tíma 'yún k'aán kō nga tínná kjuatjo. Tunga kjuatjoohó xi 'yún chjih̄i rá nga nga jaan nii.

14

B'i ts'ín tsakúya Pablo xá xi tjih̄in nga kj'ai kj'ai én nchja xuta

¹ N'e mjo kjuatjoo kō ta n'e mjo nkjin tíkjá kjuanda xi tsjá Espirituh̄u Ntíaná. Tunga ajih̄in kui niu, 'yún n'e mjo nga Ntíaná tsjánuu éhen kō nga n'ekjas'on.

² At'aha xi tsjáha Espirituh̄u Ntíaná nga kj'ai én kuinchja, kui xi Ntíaná nchjako, najmi xuta. Nkuhú Espiritu be ni xi nchja. Najmi tíña chji niu. Najmi ch'a be nkú tsuh̄u rá.

³ Tunga xi Ntíaná tsjáha éhen kō nga ts'iínkjas'en, kui xi xuta nchjako tu xi kjésíntjehen, kuasinko kō tsjá nga'yuh̄un.

⁴ Xi kik'aihi nga nchja kj'ai én xi najmi ch'a mankjih̄in, ta kuihi tsjá nga'yún subaha yjoho.

Tunga xi kik'aihi nga Ntiana tsjaha éhen ko nga ts'inkjas'en, kui xi kjesintjen xuta ninku.

⁵ Mjena kai tsa ngatentoo k'uainuu nga chubo én xi kj'ai xi tsjá Espiritu, tunga 'yuhún mje sana tsa k'uainuu nga tsjánuu Ntiana éhen ko nga n'ekjas'on. At'aha 'yún chjí saha ra xi ts'inkjas'en én xi Ntiana tsjaha nga xi nchja én xi kj'ai xi najmi ch'a mankjihin. Tunga ndahá tjín tsa tjín xi ts'ink'atiya én xi kj'ai xi tsjaha Espiritu, tu xi b'a ts'in kuisintjehen xuta ninku.

⁶ Kui b'a maha, já nts'e, tsa kfínsenuu ko kuinch-jakonuu kj'ai én xi tsjana Espiritu xi najmi ch'a mankjihin, ¿mí nihi xi sakúnuu tsa b'a ts'ian? ¿A najmi tu sahá nda tjín nga xinyanuu ni xi b'éjña chjina Ntiana, ko a ra ni xi ts'e Ntiana xi manjinna, ko a ra ts'inkjas'ennuu nku én xi kitsjana Ntiana, ko a ra tjín ni xi kuakuyanuu?

⁷ Santaha ni xi fane xi nkúhu yánaxu ko a ra arpa, tsa najmi kj'ai kj'ai ts'in fane, ¿nkú ts'in chaha suun xi t'n'ekjanekoho yánaxu ko a ra arpa?

⁸ Ko tsa najmi kjuane sisin tjio xi nchjaha já juun nga kjan, ¿yá xi k'uénda yjoho nga ngjuai kjan?

⁹ B'a ma ajinnuu. Tsa chubo kj'ai én xi najmi ch'a mankjihin, ¿nkú ts'in kamankjihin ra xuta ni xi chubo? B'a joya xi nkúhu tsa tichubajihinsón.

¹⁰ Nkjin maha én xi tjín asuntee ko nkúnkú tjihin sin.

¹¹ Tunga tsa najmi tímankjinna nkú tsuhū ra én xi tinchjakoona nku nda, nku nda xi najmi yo nankihī kamaha an ndo ko an nku nda xi xin nankihī kamana ndo.

12 B'a ta tíma ajinnuu. Mjenuu nga s'enuu nkjin tikjá kjuanda xi tsjá Espiritu Ntíaná. 'Yún ní n'e mjo nga nkjin katuma kjuanda xi kjénsintjen xuta ninku.

13 Kui b'a maha, xi nchjaha kj'ai én xi tsjáha Espiritu, katankihí Ntíaná tu xi kamaha ra ts'ínk'atiya én xi kuinchja.

14 At'aha tsa nk'ie nga kuinchjaka Ntíaná, kuinchja kj'ai én xi tsjana Espiritu, najmi ts'inchjén kjuankjink'unna. Tu animana tinchjakohó Ntíaná.

15 Kui nga, ¿mí ní xi ts'ian ní ma? Animana kuinchjakohona Ntíaná, tunga ta ts'inchjénná kjuankjintak'unna. Animana sékohona, tunga ta ts'inchjénná kjuankjintak'unna.

16 At'aha tsa tu animahi ní tín'etsjokoho ri Ntíaná ko as'ai tibasínñjuhi nku xi najmi be ni xi tín'ei, ¿nkú ts'ín nkuhú ts'ín makoho ri yjoho nga ts'íintsjoho Ntíaná nk'ie nga najmi tímankjihín ní xi tíchubai?

17 At'aha kjuaxi nga nda ts'ín tín'etsjoihi Ntíaná nga b'a tín'ei, tunga najmi tíchjusíntjenní nda xinkuu.

18 Tsjaha máb'achjihí Ntíaná nga 'yún nchja sa kj'ai én xi tsjana Espiritu nga jun.

19 Tunga nk'ie nga ma ñjakúka xuta ninku, tu sahá mjena kuinchja tsa tu un tsu'ba én xi kuitjujin kjuankjintak'unna nga te mií tsu'ba én xi najmi ch'a kamankjihín. At'aha én xi bitjujin kjuankjintak'unna, kui xi tsjáníyáha xuta xingiso.

20 Jun já nts'e, najmi b'a tu ts'ín n'enkjintak'un xi nkú ts'ín ts'innkjink'un jántí xi. Xi nkú ní ts'ín je tjíyaha ntí xi, b'a ní ts'ín je kas'eyanuu, tunga

n'enkjíntak'unnú xi nkú ts'ín ts'ínnkjink'un xutá xi chá.

²¹ B'í ts'ín tjí't'a xujun kjuatéxumoo:

Kj'ái én kō kj'ái xutá xi xin nankihi
ts'inchjén nga kuinchjaka xutá xu'bi.

Tunga ndaha tsa b'a ts'ian,
najmi kuasínñjuna, kitsú Ntíaná.

²² Kui b'a maha, kj'ái én xi tsjá Espiritu nga nchja xutá, kui xi bakúchji nga'yúhún Ntíaná ngandaha xutá xi najmi s'ejihín Ntíaná, najmi ngandaha xi ja s'ejihín. Tunga én xi tsjá Ntíaná nga n'ekjas'ehen xutá, kui xi 'bai ngandaha xutá xi ja s'ejihín, najmi ngandaha xi najmi s'ejihín.

²³ Tsa tíma ñjakú xutá nínku kō tsa ngayjee kuinchja kj'ái kj'ái én xi tsjáha Espiritu, kō tsa as'ai kjuas'en yō xutá xi najmi be ni xi tín'o kō tsa xutá xi najmi s'ejihín Ntíaná, ¿a najmi b'ahá kuitsu nga lukuu?

²⁴ Tunga tsa ngatentoo tín'ekjas'on én xi títsjánuu Ntíaná, tsa as'ai kjuas'en yō xi najmi s'ejihín kō tsa xi najmi be ni xi tín'o, nk'ie nga kuint'é ni xi tíchubo, b'a kuitsu animaha nga tjihín ngatitsun kō nga n'enijéhe ra ni xi tjehe.

²⁵ S'ejña chji ni xi tjíntu'má animaha kō kuasínkúnch'in nga ts'íintsjohō Ntíaná kō b'a kuitsu nga kjuaxi nga Ntíaná tññajinnuu.

B'í ts'ín tsakúya Pablo xi nkú n'e aya nínku

²⁶ Kui nga, ¿nkú kuixíaán ni, já nts'e? Nk'ie nga ma ñjakúkōo xinkiu, tjin xi se, tjin xi bakúyaha xutá xingisoo, tjin xi tsuya ni xi b'éjña chjihí Ntíaná, tjin xi nchja kj'ái én xi tsjáha Espiritu, kō tjin xi

ts'ínk'atiya éen. Ngatentee ni xi n'oo nga nkúnkú, b'a n'oo tu xi chjúsíntjehennu xuta nínku.

²⁷ Tsa tjin xi kuinchja kj'ai én xi tsjáha Espiritu, tsa jo ko santaha tsa jan katuma. Nkúnkú b'a incha kats'in ko nku xi kats'ínk'atiya éen.

²⁸ Tsa najmi tjin xi maha ts'ínk'atiya éen, xi nchja kj'ai én xi tsjáha Espiritu tu sahá jyu kat'ejña. Kanchjako suba yjoho ko kanchjako Ntjaná.

²⁹ Ko máha xi ts'ínkjas'en én xi tsjáha Ntjaná, tsa jo ko tsa jan katuma ko xuta xingisoo kats'ínk'atun sisin nkú tsuhu ra ni xi tint'é.

³⁰ Ko tsa nku xi kab'ejña yo Ntjaná k'uéjña chjihí kj'ai ni, kandjen jyu xi tinchjo.

³¹ B'a ts'in nkúnkú jun kama n'ekjas'on én xi Ntjaná tsjanu tu xi ngatentoo chahanu ko sakú nga'yunnuu.

³² Xi kik'aihi kjuanda nga ts'ínkjas'en én xi tsjáha Ntjaná, kui xi tihin nga skue chuba nga kuinchja.

³³ At'aha kjuajyu tsjoho Ntjaná, najmi ni xi n'ejnu n'et'a.

Xi nkú ts'in tijnaha ngayjee xuta nínku xi ts'e Ntjaná,

³⁴ jminchjün tihin nga ngjuén jyu aya nínku. At'aha najmi tihin kjuá tsa kuinchja. Kant'é'éhen x'ihin xi nkú nga títsu kjuatéxumoo.

³⁵ Tsa tjin ni xi mjehe skue, ni'yaha kandjásjaiyaha x'ihin. At'aha najmi nda tjin tsa ajihin xuta nínku kuinchja nku tachjuún.

³⁶ ¿A ajinnuuhú kich'atuts'ihin ra nga kis'enijmí éhen Ntjaná? ¿A tu nkuhú jun xi kin'ekjóhon éen?

³⁷ Tsa tjin xi b'a maha nga Ntjaná tsjáha éhen ko a ra tsa kui xi kits'ínkjáihin nku kjuanda xi tsjá

Espiritu, kui xi kats'ínkie nga kjuatéxumaha Nda Ntíaná xi t'ib'et'ánuu ei.

³⁸ Tsa t'jín xi najmi ts'íinsihín ni xi t'ib'et'ánuu ei, najmi tu n'esihūun ko kui.

³⁹ Kui b'a maha, já nts'ena, katuma mjenuu nga Ntíaná katsjánuu éhen nga n'ekjas'on ko najmi tu b'ech'óhoo xi kuinchja k'jáí én xi tsjá Espiritu.

⁴⁰ Ngatentee ni xi n'oo, n'esisiun ko tankínko ch'ich'iun.

15

B'i ts'ín kits'ínkj'áítsjehen Pablo xuta nínku Corinto ni xi tjun tsakúyaha

¹ Ko nd'ai já nts'e, mjena ts'ínkj'áítsjennuu én nda tsuhu Nda Ntíaná xi y'enijmínuu, xi kin'ekjóhooon ko xi ndjá tinchajiun.

² Kui én nda tsu xu'bi ts'ín nga k'uankinuu yjonuu. B'a kama tsa n'etjusun én xi y'enijmínuu. At'aha tsa najmi, tsuhu ra ma nga tu kjuandahá kis'ejinnuu éen.

³ Títjun kits'ínkj'ás'énuu én xi kits'ínkj'áíhín, nga ngat'aha ngatitsunná k'iehen Cristo. B'a kama xi nkú ts'ín t'jít'a xujun éhen Ntíaná.

⁴ Kis'eyanji ko nistjin xi ma jahan j'áíya ngáha ra ngabayoo, xi nkú ts'ín t'jít'a xujun éhen Ntíaná.

⁵ Tsakúchjihí yjoho Pedro ko askahan já postru xi te joo.

⁶ Askahan nkuhú nga tsakúchjihí ra yjoho ts'ati un unchan já nts'eé. Nkjin maha xi t'jintu sa xi incha kíkíe Nda Ntíaná ko k'ua xi ja k'ien.

⁷ As'ai ta tsakúchjihí yjoho Santiago ko askahan ngayjee já postru.

⁸ Kō xi fekuhu, askahan kjin tsakúchjina yjohō.

⁹ At'ahā b'a xian nga an xi 'yún ichí sa ajihin já postru kō najmi ma k'an tsa nda postru xihin yjonā, at'ahā kitsjennkí unkie xutā ninkuhu Ntjaná.

¹⁰ Tunga tu ngat'ahā ní kjuandahā Ntjaná tsichu mahana yáha an nd'ai, kō najmi tu kjuandahá kitsjana kjuandahā Ntjaná. An xi 'yún kits'inxá sa nga ngayjee já postru xingisoo. Tunga najmi ahán xi b'a kits'ian. Kjuanda xi kik'ai nína, kui xi b'a kits'íun.

¹¹ Kui b'a maha, tsa an kō tsa já postru xingisoo, én nda tsuu y'enijmíi kō kui xi kis'ejinnuu.

B'i ts'in tsakúya Pablo nk'ie nga kj'uaíya ngáha ra xutā xi ja k'ien

¹² Tunga tsa ni xi tís'enijmíhi nga j'áíya ngáha ra Cristo ngabayoo, ¿nkú ts'in b'a tíincha tsuhu k'ua xi tjín ajinnuu nga najmi ta kj'uaíyahā ra xutā xi ja k'ien?

¹³ At'ahā tsa najmi kj'uaíyahā xutā xi ja k'ien, ta ndaha Cristo najmi j'áíyahā ngabayoo ma.

¹⁴ Kō tsa najmi j'áíyahā Cristo ngabayoo, kui xi tsuhu ra ma nga tu kjuandahá tíb'enijmíi kō nga tu kjuandahá tís'ejinnuu éen.

¹⁵ Tsa ni xi b'a tjíhin nii, já tsank'á ní jin, at'ahā najmi b'a tjín ni xi túbixínyai. B'a tíxian at'ahā jin tsixínyai nga Ntjaná kits'ínkj'áíyahā Cristo ngabayoo, tunga tsa najmi ta kj'uaíyahā ra xutā, kui xi tsuhu ra nga najmi j'áíyahā Cristo.

¹⁶ At'ahā tsa najmi ta kj'uaíya ngáha ra xutā xi ja k'ien, ta ndaha Cristo najmi j'áíyahā.

17 Tsa najmi j'áiyahá Cristo ngabayoo, tu kjuandahá kis'ejinnuu ni xi kis'ejinnuu. Tu yje tintsubajihín so ngatitsunnuu b'a.

18 Ko ta ja kindyja xuta xi k'ien xi kis'ejihin Cristo.

19 Tsa ni xi tu eihí asunntej tichuyáá ni xi sakúná at'aha s'ejinná Cristo, tu xí kintehé tsjéheén ngayjee xuta xi ta tjín asunntej b'a.

20 Tunga j'áiya kjuaxihí ra Cristo ngabayoo. Kui xi nkú joyaha chan xi tjun xi 'baihi Ntíaná, at'aha kui xi tjun j'áiyahá ajihin xuta k'ien.

21 At'aha xi nkú ts'ín ngat'aha ni xi kits'ihin nku nda j'aikjas'ehen ngabayoo, b'a ta ts'ín ngat'aha ni xi kits'ihin kj'ai nda kj'uaíyahá xuta ngabayoo.

22 Xi nkú ts'ín ngat'aha ni xi kits'ín Adan fesuhun ngayjee xuta, b'a ta ts'ín ngat'aha ni xi kits'ín Cristo n'ek'íentu tik'un síhin ngayjee xuta.

23 Tunga f'áiyahá ra nga nkúnkú xi nkú ts'ín kanéhe. Tjun j'áiyahá Cristo ko askahan nk'ie nga kj'uaí ngáha kj'uaíyahá xuta xi ts'e.

24 Nk'iehé kuitjusunyje ni xi kama asuntee. Tjun ts'ínkje Cristo ngayjee xi batéxuma ko ngayjee xi tjihin xa ko xi tjihin nga'yún, ko askahan ts'ínkjas'en má batéxuma aya ntsja Ntíaná xi Na'miná maha.

25 Tjihin nga kuatéxuma Cristo santaha nkúhu nga k'uéntu kinte sjai ngayjee xi tífi kontraha.

26 Kontra xi kfekuhu nga n'ekje, kui xi ngabayoo.

27 At'aha Ntíaná kits'ínk'íentu kinte sjai Cristo ngayjee ni xi tjín. Tunga nk'ie nga b'a títsu éhen Ntíaná nga kin'ek'íentu ngayjee ni xi tjín kinte sjai

Cristo, t́inchja chji chji nga najmi ko Nt́ianá xi t́jńa kinte sjai Cristo, at'aha kui xi b'a kits'íun.

²⁸ Nt́ianá kits'ínkjas'eheñ aya ntsja Cristo ngayjee ni xi t́jń, ko nk'ie nga kits'ínk'íentu Cristo ngayjee ni xi t́jń kinte sjai, as'ai ko ta Cristo xi Nt́ih Nt́ianá ts'íinkjas'eheñ yjoho Nt́ianá. B'a ts'ín Nt́ianá nkuhú kui kama ts'ehe ngayjee ni xi t́jń.

²⁹ Tjń xi baténtá yjoho ngajoho xuta xi ja k'ien. Tunga tsa najmi kj'uaíyaha xuta xi ja k'ien, ¿á ngajoho xuta xu'bo incha baténtáha yjoho xi b'a ts'íun?

³⁰ Ko jin, ¿á t́n'ekjálhín rí ni ch'onk'un xi t́mat'ain tehenteheñi?

³¹ An bí, já nts'e, xki nístjin t́jńajihín ngabayoo. Kjuaxi ni xi t́xinnuu xi nkú ts'ín kjuaxi nga tsjo mana nga s'ejinnuu Nda Nt́ianá Jesucristo.

³² Nanki Efeso kis'ekona kjuasti já xi b'a ts'ín kjan xi nkúhu chu kjan, tunga tsa najmi ta kj'uaíya ngáha ra xuta xi ja k'ien, ¿mí nihi xi tsijnena nga b'a kits'ian? Tu sahá b'a n'eé xi nkú incha tsu k'ua já: “S'ía ko chineé, at'aha ndyjunní kuayáá.”

³³ Najmi tu 'bainto tsa t́jń xi k'uanachannuu. Yo nga b'a tsu én: “Xi tsjenko xuta xi ch'onk'un, ta ch'onk'un bitju.”

³⁴ N'ek'óntjaiyo kjuankjintak'unnuu ko najmi tu n'o ngatitsun. At'aha t́jń ajinnuu xi najmi be ni xi ts'e Nt́ianá. B'a t́xinnuu tu xi kama subahanuu.

B'í ts'ín tsakúya Pablo nkú kama nk'ie nga kj'uaíya ngáha ra xuta xi ja k'ien

³⁵ Kutsa t́jihín xi b'a kuitsu: “¿Nkú kama nk'ie nga kj'uaíya ngáha ra xuta k'ien? ¿Mí yjonintehe xi k'ua ngáha?”

36 jji nda nchini xi b'a t**í**bixín! Ni xi b'entjei najmi kuasu tsa najmi títjun kuayá.

37 Najmi ni xi stj**ú**kj**ó**o b'entjei. Xujmá ní b'entjei, tsa xujmá tuniñu ko tsa kj'**ái** xujmá.

38 Nt**í**aná tsj**á**ha xujm**ó**o yjoninte xi mjehe. Nga nkú**n**kú xujm**ó**o tsj**á**ha yjoninte xi kanéhe.

39 Najmi tu nku ch**u**ba yjoninte xi t**j**ín. Kj'**ái** k'un yjonintehe x**u**ta ko kj'**ái** k'un xi ts'**e** ch**u**. Kj'**ái** k'un ngá xi ts'**e** n**í**see ko ta kj'**ái** k'un xi ts'**e** t**u**.

40 B'a ta ts'**ín** kj'**ái** k'un ni xi t**j**ín nk'a ján ko xi t**j**ín t'ananki**u**. Tsjo k'un xi t**j**ín nk'a ján ko tsjo k'un xi t**j**ín t'ananki**u**, t**u**nga kj'**ái** kj'**ái** kjuatsjo xi t**j**í**h**ín.

41 Ts'**í**u kj'**ái** ts'**ín** bat'ai, ko sóo kj'**ái** ts'**ín** bat'ai, ko niñu**u** kj'**ái** ts'**ín** bat'ai ngá. Ko nga nkú**n**kú niñu xi t**j**ín kj'**ái** kj'**ái** ts'**ín** bat'ai.

42 B'a ta k**a**ma nk'ie nga kj'**u**áiya**h**a x**u**ta ngabayoo. S'eyanji yjoninte xi m**a**ha batsun, t**u**nga yjoninte xi kj'**u**áiya ngá**h**a r**a** najmi ta k**a**maha r**a** kuats**u**hun.

43 S'eyanji ni xi najmi chumi ni ch**j**í**h**i r**a**, t**u**nga nk'ie nga kj'**u**áiya ngá**h**a r**a** s'**e**he kjuachánka. S'eyanji xi najmi t**j**í**h**ín nga'yún, t**u**nga nk'ie nga kj'**u**áiya ngá**h**a r**a** s'**e**he nga'yún.

44 S'eyanji yjoninte xi kich'aá nd'**ai**, t**u**nga kj'**u**áiya ngá**h**a r**a** yjoninte xi Espirit**u**h**u** Nt**í**aná k'**u**énda xi nkú ts'**ín** mjehe. Tsa t**j**ín yjoninte xi nkúhu xi kich'aá, ko ta t**j**ín ngá xi k'**u**énda Espirit**u**h**u** Nt**í**aná.

45 B'a ts'**ín** t**j**ít'a xujun éhen Nt**í**aná: “Nda xi tjuun kin'enda ko y'ejña t**í**k'un.” Kui xi Adan. T**u**nga Adan xi fekuhu, xi Cristo, kui xi tsichu ma Espirit**u** xi ts'**ín**k'**í**é**ntu** t**í**k'un x**u**ta.

46 Tunga najmi kjuatík'un xi tsjáhá Espiritu xi tjun. Títjun ní kjuatík'un xi tsjá asuntei, askahan kjuatík'un xi tsjá Espiritu.

47 Nda xi tjuun ndyjo t'anankiu kin'endakoḥo, tunga nda xi ma joho ndjiojmi ján nibaha.

48 Xi nkú tjín nda xi kin'endakoḥo ndyjo t'anankiu, b'a ta k'un ngayjee xi ts'e t'anankiu. Ko xi nkú tjín nda xi nibaha ndjiojmi ján, b'a ta k'un ngayjee xi ts'e ndjiojmi ján.

49 Xi nkú ts'ín tjíyaná nd'ai xi nkúhu nda xi kamandakoḥo ndyjo t'anankiu, b'a ta ts'ín s'eyaná xi nkúhu nda xi kin'e nibáha ndjiojmi ján.

50 Jun já nts'e, tíxinyanuu nga yjoninte xi kich'aá nd'ai najmi kama kjuas'enjin nga Ntjáná kuatéxumaha. Ta ndaha ni xi maha batsun najmi ma sakúntehe ajihin ni xi najmi maha batsun.

51 Xínya manuu ni xi tíña 'maná. Najmi ngatenteé kuayáá, tunga ngatenteehé k'oóntjaiyaá.

52 Xi nkú ts'ín kitsa b'echjáá ko chjux'aá tunkaán, b'a ts'ín kitsa k'oóntjaiyaá nk'ie kjuane tjio xi fekuu. At'aha kjuane tjioo, as'ai kj'uaíyaha ngabayoo xuta xi ja k'ien tu xi najmi ta kuayá saha, ko ñá ta k'oóntjaiyaá.

53 At'aha yjoninte xi kich'aá nd'ai xi maha batsun tjihin nga yjoninte xi najmi maha batsun kama. Yjonintená xi maha 'me nd'ai tjihin nga yjoninte xi najmi ta kuayáha kama.

54 Nk'ie nga yjonintená xi maha batsun kama yjoninte xi najmi maha batsun, ko nk'ie nga yjonintená xi maha 'me kama yjoninte xi najmi ta kuayáha, nk'iehé kuitjusun én xi tjt'a:

Ja kuan'ekje ngabayoo, ja kuan'e nganha.

55 Ji ngabaya, ¿má n̄i nga kin'e nganai?

Ji ngabaya, ¿má n̄i nga'yún
xi n'ek'ienkohoni xuta?

56 Āt'aha ngabayoo ts'ínchjén ngatitsuun nga
ts'ínk'ienkoho xuta, kō ngatitsuun ts'ínchjén
kjuatéxumoo nga bakúchji ni xi 'mih̄i ngatitsuun.

57 Tunga máb'achj̄ih̄i ra Nt̄ianá, kui xi tsjáná nga
n'e nganaáha ngabayoo ngat'aha ni xi kits'ín Nda
Nt̄ianá Jesucristo.

58 Kui b'a maha, já nts'ena xi 'yún tjona, ndjá
tincho kō t̄jen nga'yúh̄uun yjonuu. Tehente
tankínkō ndju so xáha Nda Nt̄ianá. Yo nga najmi
xá tiya t̄ín'o nga Nda Nt̄ianá t̄ín'exát'ohoo.

16

*B'i ts'ín kitsúya Pablo nga n'esúhun toon chje xuta
n̄inku Jerusalen*

1 Máha ngat'a ts'e toon chje xi t̄imasúhun xuta
n̄inku Jerusalen, b'a ta n'oo xi nkú nga kixih̄in
xuta n̄inku xi t̄j̄ntu nanki xi t̄j̄n ante Galacia.

2 Xi nkú t̄j̄n mahanu, xki tumínku t'ej̄ña t'axiún
ichí toon nga nkúnkú. Xi nkú t̄j̄n sakúnuu, b'a
t̄j̄n t'ej̄ña t'axiún. Ch'at̄jó toon tu xi nk'ie nga
kuichusehenuu najmi t̄j̄hin nga chj'asúhun toon
chje.

3 Nk'ie nga kuicha yo ts'inkj̄á nanki Jerusalen
xuta xi jun chj'ajiun kō tsjaha xujun má nga an
t̄ib'exá, tu xi ngjuaikoho ra toon xi kin'esúun xuta
n̄inku xi t̄j̄n ján.

4 Tsa nda t̄j̄n nga kō an kf̄ián yo, ta ts'inka niyá
jóo.

B'i ts'ín kitsúya Pablo ni xi t̄j̄ndaha nga ts'ín

⁵ Kfínsenuu, tunga nk'iehé nga kj'ua ante Macedoniá kfínsenuu, at'aha tjihin nga kj'ua nanki xi tjin yo.

⁶ Kutsa nkjihín nistjin kúátejñajinnuu nga kuicha yo. Kutsa yohó ts'inkj'a nistjin chunch'oon, tu xi b'a ts'in kama kuisinkohonú má xi tjeheh kfin ngáhana askahan.

⁷ At'aha najmi mjena tsa tu skuehénuu nga kj'ua yo. Mje nina nkjin nistjin kúátejñajinnuu. B'a ts'ian tsa Ntjaná tsjántena.

⁸ Tunga kúátejñaná nanki Efeso santaha nkúhu nga kuichú S'í Pentekoste,

⁹ at'aha sakúntena nga ts'inxá sisan, ndaha tsa nkjin maha xi fi kontraha ni xi tít's'ian.

¹⁰ Tsa kuichúsenuu Timoteo yo, nda n'e n'ekjóhooon tu xi tsjo k'úéhe ra nga k'úéjñajinnuu. At'aha ta xaha Nda Ntjaná tít's'in xi nkúhu an.

¹¹ Kui nga najmi tu 'bainto tsa tjin xi tu tohón kamaha ndo. Tu sa ní tisinkoo tu xi nda ts'in kats'inndjuúhu niyáha nga kj'uaísehena ei. Kas'ehe kjuajyu nga kanibá, at'aha tikuyá nga kj'uaíko já nts'eé xingisoq.

¹² Máha nda nts'eé Apolo, b'a kixin nkjúhun nga ngjuaike já nts'eé xi ngjuaitsubek'únnuu, tunga najmi kits'in yuhú nga nd'ai ngjuai. Nk'ie rú nga sakuntehe, nk'ie rú nga ngjuai.

B'i ts'in kits'inkje Pablo xujin

¹³ Tintsuba ndo ko ndjá tinchajiun xi s'ejinná. Ndjá n'esjo yjonuu ko tjen nga'yúhuun yjonuu.

¹⁴ Ngayjee ni xi n'ekoo xinkiu, katakúchji kjuatjonuu.

¹⁵ Jun já nts'e, yo nga xuta xinkjín nda Estefana tjun kits'ínkjáihín éhen Ntíaná ajihín xuta xi tjín ante Akaya kó kitsjáha yjohó nga tjincha basinko xuta ninku.

¹⁶ Tíbankinuu nga tasinñjuhúu xuta xi b'a k'un xi nkúhu xuta xu'bi kó ngayjee xi ta kuihi xá xi ts'ín kó xi ts'ínkjas'ehen yjohó xóo.

¹⁷ Tsjo mana nga j'aisena Estefana kó Fortunato kó Akaiko, at'aha ngajonuu incha tsasinkona.

¹⁸ Kits'ín nga kikjenta animana xi nkú nga ta kits'ín ajinnuu. Xuta xi nkúhu xu'bi kayaha nga nda nkjún xá xi ts'ín.

¹⁹ Títs'ínkjinuu kjuasuniña xuta ninku xi tjín ante Asia. Akila kó Priscila kó ngayjee xuta ninku xi ma ñjakú ni'yaha 'yún títs'ínkjinuu kjuasuniña jun xi ta s'ejinnuu Nda Ntíaná.

²⁰ Kó ngayjee já nts'eé xi tjín ei títs'ínkjinuu kjuasuniña. B'i ngján súníñohóo xinkú.

²¹ An Pablo ntuna tít'et'áhanuu kjuasuniñana.

²² Tsa tjín xi najmi tjohó Nda Ntíaná Jesucristo, kui najmi nda katuma nginkun Ntíaná. ¡Nibái Nda Ntia!

²³ Kas'enuu kjuandaha Nda Ntíaná Jesucristo.

²⁴ Tjona ngatentoó jun xi nkú ts'ín Cristo Jesu tjohó ñá.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

e05183c2-7c34-5cdd-8c78-15ea51bd8cbb